

程



歷官表奏目錄

卷第一

辭免察官狀

辭免起居郎狀

申三省乞罷兼職第一劄子

第二劄子

奏乞罷兼職狀

乞宮觀狀

乞未赴南劍申省劄子

乞避私諱申省劄子

辭免秘書少監兼權直學士院狀

草晁公武詔書不當待罪狀

求外劄子

乞免學士院兼職劄子



乞宮觀狀

乞改作時暫兼權兵部侍郎劄子

辭免權禮部侍郎狀

辭免升同修國史實錄院同修撰狀

申省再辭狀

謝禮部侍郎表

舉自代狀

辭免兼侍講狀

謝侍講表

辭免書吳璘碑狀

乞免兼中書舍人劄子

謝宮觀表

辭富沙乞宮祠狀三首

謝宮觀表

謝右文殿修撰表

辭免詔命申省狀

到闕上殿乞郡奉祠劄子

除待制辭免狀

謝待制侍講表

舉自代狀

丐外劄子

辭免兼直學士院狀

辭免兵部侍郎狀

辭免兼侍講狀

附不
允詔

謝兵部侍郎兼直學士院表

舉自代狀

卷第二

謝侍講表

辭免兼詹事狀

附不
允詔

東宮賀冬牋

東宮賀正牋

祭社祝文待罪劄子 謝宣諭劄子

辭免轉官狀 附不 允詔

辭免書韓世忠神道碑劄子

繳書神道碑劄子 辭免潤筆劄子

謝劄 辭免升兼侍讀狀 附不 允

謝侍讀表 辭免侍郎狀 附不 允詔

謝吏部侍郎表 舉自代狀

請外劄子

吏部侍左進天申節功德疏右語

東宮賀冬牋 東宮賀正牋

辭轉官狀 附不 允詔 辭免翰林學士狀 附不 允詔

宣召節次 口宣 附

謝宣召入院表 謝表

舉自代狀 謝衣帶鞍馬表

卷第三

辭免兼修國史狀 附不 允詔

舉李塾賢良不應格待罪劄子

東宮賀冬牋 東宮賀正牋

乞郡劄子 附不 允詔 再乞外任劄子

奏謝劄子 再乞去劄子 附不 允詔

第三乞外劄子

第四乞在外宮觀劄子

附不允詔

奏謝劄子

辭免轉官劄子

附不允詔

奏乞宮觀劄子

奏謝劄子

辭免禮書兼翰林院狀

附不允詔

謝表

舉自代狀

東宮賀冬牋

東宮賀正牋

謝御書劄子

謝賜新茶狀

辭免日曆轉官狀

丐外祠劄子

附不允詔

再乞外祠劄子

奏謝劄子

辭免東宮轉官狀

附不允詔

乞宮觀第一劄子

附不允詔

乞宮觀第二劄子

奏謝劄子

繳還殿中監職事申狀

明堂禮成賀東宮劄子

未即詣東宮劄子

會慶賀劄

辭免吏部尚書兼翰林學士承旨狀

附不允詔

再辭免兼翰林學士承旨狀

附不允詔

第三辭免兼翰林學士承旨劄子

謝表

舉自代狀

卷第四

東宮賀年牋

同講筵官辭免進讀三朝寶訓終篇轉官狀附不允詔

申省狀
進謝恩詩表

同侍從慰皇子魏王薨奏

乞宮祠劄子附不允詔
再乞宮祠劄子

奏謝劄子

辭免參知政事劄子附不允詔

辭免參知政事表附批答
批答口宣

謝參知政事表
謝太上皇帝表

謝東宮牋

辭免正謝賜衣帶鞍馬劄子

辭免兼勅局劄子附不允詔
附生日詔

謝表
旱灾待罪劄子附不允詔

乞罷黜表
再乞罷黜劄子附御筆

東宮賀冬牋

卷第五

東宮賀年牋
辭免劄子附不允詔

再辭表附批答
謝轉官表

謝太上皇帝表
謝東宮牋

同趙相已下以霖雨待罪劄子附不允詔

再乞罷黜劄子附不允詔
附中元賜生日詔書

謝表

東宮賀冬牋

乞罷政劄子

附不允詔

乞罷政表

附不允詔

乞通進司收接文字劄子

附賜生日詔書

謝表

乞序位李彥穎下劄子

第二劄子

辭免知樞密院事劄子

附不允詔

辭免知樞密院事表

附批答

口宣

謝表

謝太上皇帝表

謝東宮牋

謝明堂加恩表

乞與王嘉賓換闕劄子

卷第六

同施樞密以旱灾乞罷黜劄子

附不允詔

同二府乞罷黜劄子

附不允詔

旱灾乞黜表

再乞黜劄子

附御札不允

奏謝劄子

預辭生日牲籩奏

附御批

附生日詔

謝表

為二兄乞再任宮祠劄子

東宮賀冬牋

太上皇后慶壽賀東宮劄子

辭免樞密使劄子

附不允詔

辭免樞密使表

附批答

辭免樞密使第二表 附批 謝表

謝太上皇帝表 附 生日詔

謝表 賀東宮生辰劄子

東宮賀冬牋 東宮賀年牋

天申節滿散功德疏

乞令宰臣兼樞密使劄子

附 生日詔 謝表

問聖體劄子 東宮賀冬牋

郊祀禮成謝加食邑表 謝太上皇帝表

謝東宮牋 免赴正旦入賀劄子

卷第七

賀正旦表

德壽宮慶壽起赴不及劄子

東宮賀正牋 請假十日劄子

謝宣醫劄子 謝賜藥方劄子

辭慶壽轉官加恩劄子 附 不允詔

辭轉官加恩劄子 附批 答

辭轉官加恩第二表 附批 謝表

謝太上皇帝表 謝東宮牋

附 生日詔 謝表

求祠第一劄子

第二劄子 附不允詔

第三劄子 附不允詔

東宮賀冬牋

辭免進書減磨勘劄子 辭免右丞相劄子 附不允詔

又辭免右丞相劄子 東宮劄子

辭右丞相表 附批答 第二辭表 附批答

謝表 謝太上皇帝表

辭免兼職劄子 附不允詔

因陳賈論王謙待罪劄子 附不允詔

夏旱乞罷政劄子 附不允詔 第二劄子

乞罷政表 附不允詔

再同王丞相黃參政乞貶降劄子

再乞罷政劄子 辭免生日牲餼劄子

同王丞相黃參政乞減俸劄子

辭免復俸劄子 附不允詔 賀東宮生辰劄子

卷第八

辭免謚冊寶行禮支賜銀絹劄子

攝太傅持節前導太上梓宮量帶激賞庫官會犒

設劄子

光堯梓宮發引慰皇帝表

慰皇太后牋

慰皇后牋

光堯梓宮到思陵攢宮安寧狀

慰皇太后牋

慰皇后牋

三月二十四日奏

三月二十七日奏

思陵掩攢慰皇帝表

慰皇太后牋

慰皇后牋

乞導從虞主還行在奏

謝傳宣撫問并賜銀合茶藥狀

未敢乞對劄子

辭免德壽宮銀絹劄子

求去劄子

辭免提舉編修玉牒劄子

附不允詔

再辭免劄子

明堂禮成同宮僚賀東宮劄子

謝封濟國公表

謝東宮牋

辭免加恩正謝日權賜劄子

乞去劄子

辭免左丞相劄子

附不允詔

第二劄子

東宮劄子

乞去第一劄子

附不允詔

第二劄子

第三劄子

第四劄子

辭免左丞相表

附批答

第二辭表

附批答

謝表

謝東宮牋

辭免兼職劄子

附不允詔

卷第九

辭免少保劄子 附不允 詔

辭免表 附批 答

再辭免表 附批 答

再辭免劄子 附不允 詔

第三辭劄子 附不允 詔

第四辭劄子

辭免冊命劄子 附不允 詔

乞序位在嘉王之下

謝除少保表

謝重華宮表

辭免講堂轉官回授劄子 附不允 詔

辭免轉官公據劄子 附不允 詔

辭免親饗禮儀使支賜劄子

乞去劄子 附御批

再乞去劄子

再乞去狀

辭免除職判潭州劄子 附不允 詔

再辭表 同日奏劄

重華宮奏劄

乞以元官奉祠并免謝辭劄子

謝除醴泉觀使表 重明節進功德疏右語

重明節開啟疏 重明節賀表

重華宮會慶節功德疏右語

重華宮會慶節賀表 冬至節賀表

卷第十

年節賀表

重明節祥符寺開啟疏

重明節天慶觀開啟疏

重明節進功德疏右語

重明節賀表

重華宮會慶節進功德疏右語

重華宮會慶節賀表

冬至節賀表

辭免判隆興府劄子

貼黃 附不允詔

年節賀表

辭免判隆興府第二劄子 附允詔

繳勅書銀合臘藥狀

重明節進功德疏右語

重明節賀表

重華宮會慶節進功德疏右語

重華宮會慶節賀表

辭免觀文殿學士判潭州劄子 附不允詔

再辭免劄子 附不允詔 三辭免劄子

冬至節賀表

郊祀禮成賀表

潭州謝上表

郊祀謝赦表

郊祀禮成謝加食邑表

高宗加上謚號賀重華宮表

賀皇帝表

附 賜銀合臘藥勅書

謝表

附 賜紹熙三年曆日宣

謝表

年節賀表

問聖體劄子

賀御殿劄子

辭免復觀文殿大學士劄子

附不允詔

辭免復觀文殿大學士表

附不允詔

謝表

附賜銀合夏藥勅書

謝表

降郡公謝表

重明節進功德疏右語

會慶節進功德疏右語

會慶節進銀狀

冬至節賀表

丐祠劄子

附不允詔

附賜銀合臘藥勅書

謝

謝賜紹熙四年曆日表

卷第十一

年節賀表

誕皇孫賀重華宮表

賀皇帝表

乞宮祠奏

第二劄子

附賜銀合夏藥勅書

謝表

謝復益國公表

重明節進功德疏右語

乞宮祠狀 附不允詔

辭免隆興府狀

附不允詔

慈福慶壽賀表

附賜銀合臘藥勅書

謝表

再辭判隆興府狀

謝醴泉觀使表

重華上仙慰皇帝表

重華上仙慰太皇太后表

重華宮功德疏右語 移御壽康宮起居表

皇帝登寶位賀表 重明節開啟疏

重明節功德疏右語 重明節賀表

瑞慶節開啟疏 瑞慶節滿散疏

瑞慶節功德疏右語 瑞慶節賀表

冬至節賀表 明堂禮成賀表

辭免覃恩轉官狀 附不允詔

覃恩辭免轉少傅表 附不允詔

謝差官賜告狀 又手劄

再辭免覃轉表 附不允詔 乞將覃轉回授狀

申尚書省狀 謝明堂禮成加恩表

卷第十二

乞致仕表 附不允詔 第二表 附不允詔

第三表 謝致仕表

辭免冊命狀 孝宗小祥起居表

賀重明節表 賀生皇子表

賀三宮冊寶禮成表 賀韓皇后冊禮表

慰慈福上仙表 重明節功德疏右語

賀瑞慶節表 謝郊祀禮成加恩表

謝慶禮支賜狀

賀生皇子表

慰太上皇后上仙表

慰太上皇帝上仙表

壽康宮追薦疏語

謝明堂禮成加恩表

慰韓皇后上仙表

謝降官表

賀太皇太后加上尊號表

辭免復少傅狀

附不允詔

賀立楊皇后表

謝復少傅表

賀瑞慶節表

謝郊祀禮成加恩表

賀瑞慶節表

歷官表奏目錄

終

歷官表奏卷第一

周益文忠公集一百二十二

紹興三十二年

辭免察官奏狀

左宣教郎秘書省正字兼國史院編脩官臣周某狀奏
右臣今月四日準尚書省劄子三省同奉聖旨除臣監
察御史日下供職者自天有命躋地無容伏念臣奮自
寒鄉最為冗士獻芻言於召試之日蒙睿獎於面對之
初又並英游莫伸薄效不圖簡記更誤選掄分直栖鳳
之南察事行馬之外臣猶自駭人謂斯何敢陳量己之
言祈寢出綸之渥俾安舊次免累聖知伏候勅旨

五月五日

文瑞樓

三省同奉
聖旨不允

辭免起居郎奏狀

左奉議郎監察御史臣周某狀奏右臣今月二十二日
準尚書省劄子三省同奉聖旨除臣起居郎日下供職
者明命初傳震恐無地臣竊以柱下置史君舉必書自
我祖宗甚難此選或以久次文館或以嘗歷劇曹或以
德望詞華度越流輩然後稽參輿論舉而授之未有資
淺望輕徑躋而躡至者也如臣無狀豈不自知欲勉於
問學而智識甚凡欲勤於事為而才力不逮三年朝路
一善未聞太上皇帝意其退縮似恬靜鄙樸似愚直拔

而寘之六察之列使事陛下今既數月矣畧無補報日
夜常自刻責豈謂驟膺簡擢入侍螭階稽之舊章既慙
踐歷絜之近比更愧超踰幸今誤恩雖加而贊辭未出
擇人改授猶可及也惟陛下矜其誠懇而俯從之臣不
勝幸願謹錄奏聞伏候勅旨

八月二十四日三
省同奉聖旨不允

申三省乞罷兼職第一劄子

右奉議郎試起居郎兼編類聖政所詳定官兼權中書
舍人周某劄子昨準尚書省劄子奉聖旨兼權中書舍
人今來正官員數已多合行罷權候指揮

十一月二十
五日三省同

奉聖旨令周某依舊
兼權陳俊卿職事

第二劄子

某先奉聖旨兼權中書舍人今緣正官員數已多遂乞
 罷權今月二十五日準尚書省劄子奉聖旨令依舊兼
 權陳俊卿職事者某竊惟官闕則權員多則罷此亦常
 事何待固辭况外制已有兩人而奉使於外者又將還
 闕豈可以某暫曾攝事姑令依舊充員居之不安其敢
 自恕欲望再於敷奏俯從所請庶幾小官不失辭受之
 義候指揮十一月二十六日三省同奉聖旨依已降指揮不允

奉乞罷兼職狀

臣近者兩具劄子乞罷兼權中書舍人職事準尚書省

劄子三省同奉聖旨依已降指揮不允伏念臣昨被旨
 兼攝之初豈不知與聞基命潤色書贊非臣不達國體
 素無文采之人所能勝任然以謂劉珙出使不過數月
 西掖獨員或有妨礙故雖自知非據亦復承命不辭今
 劉珙將歸唐文若張震在職若猶迫於威命儼然如舊
 則是暫權乃欲久假兩請皆為文具於臣辭受之義無
 乃戾乎又况遇闕則他職兼領官多則指日罷去蓋百
 司庶府之常事臣不敢遠有援引昨見侍讀闕官嘗命
 侍講黃中時暫兼權尋除洪遵中即乞罷若計侍讀員
 數則中尚可兼領此最近事人皆知之今臣所以力辭

本非廉退但事體當爾不敢中輟區區之心實在於此
 伏望聖慈特賜矜察許臣解罷上件兼權職事非惟私
 義得以少安抑亦免為識者之所譏誚不勝幸甚疊冒
 天威罪當萬死取進止

十二月十一日三省同奉聖旨不允

隆興元年

乞宮觀奏狀

左奉議郎試起居郎兼編類聖政所詳定官兼權中書
 舍人臣周某狀奏臣輒瀝血誠仰干聖造伏念臣先塋
 多在吉州惟臣母葬信州久欲遷奉緣臣備數於朝力
 所未能爰自今年正月屢經朝廷陳乞假告繼又力請

外祠而宰執不為敷奏因循至今人子之心晨夕不遑
 緣此心氣怔忡居常抱病安能纂修記注攝贊書命必
 由曠職重抵司敗之誅若非觸冒萬死投誠君父則進
 退失據誰肯為臣言者伏望聖慈下臣此章宣問宰執
 如臣前此果因遷葬乞去非敢矯妄即授臣宮觀一次
 使遂其區區之志臣今齒髮尚壯它時或有繁劇任使雖
 赴湯蹈火所不敢辭輕犯天威臣無任震灼俟命之至
 謹錄奏聞伏候勅旨

任

三月二十八日三省同奉聖旨依所乞差主管台州崇道觀任便居

乾道六年

乞未赴南劍申省劄子 三月二十七日

左朝奉郎新權發遣南劍州周某劄子昨準出差權發遣南劍州替王罔待闕已及二年依近制合赴行在奏事緣其舊有心氣之疾近來發歇不常觸事情忘見往它處尋訪醫藥若不自度勉強前去不惟到闕之日定失朝儀亦慮臨民之際決致瘵曠欲望朝廷特與敷奏改授祠廟差遣或許改替已差下人劉敏求庶幾他日所患痊平尚能効犬馬之力伏候指揮

右勘會已降指揮除福建路提刑填見闕今劄付新除福建路提點刑獄公事周朝奉疾速前來奏事訖

前去之任準此

乞避私諱申省劄子 五月十五日

左朝奉郎周某準尚書省劄子三月二十五日三省同奉聖旨除其福建路提點刑獄公事填見闕伏念某去國八年復叨委使感戴上恩豈應辭避但其父名利建與本路名號相犯既非所連之字即與偏諱不同兼某近以心氣舊疾時復發作方辭典郡敢冒察州欲望朝廷檢會前劄及今來乞避私諱事理特與敷奏畀以祠祿或改授一待闕差遣庶幾愚分得以少安緣再準省劄令疾速前來奏事訖前去之任不敢稽違朝命見逐

遷至前路聽候指揮吏部供到檢準紹興令諸府號官稱犯父祖嫌名及二名偏犯者皆不避勤會本官父名利建即係二名偏犯依條不合迴避申聞事

右劄付新除福建路提點刑獄公事周朝奉遵已依劄下事理疾速奏事訖前去之任準此

辭免秘書少監兼權直學士院奏狀

左朝奉郎新權發遣福建路提點刑獄公事臣周某狀奏右臣今月十八日準尚書省劄子三省同奉聖旨除臣秘書少監兼權直學士院者冒膺兼組增震孤衷竊以貳職仙蓬攝官禁苑俱為清選專用名儒伏念臣早誤聖知中歸農畝八歲傾心於天日一朝稽首於軒墀辱臨遣之温言將適驅於暑路忽叨改命大過初心惟舊學之素迂加比年之病忘雖厚恩未報詎敢忘魏闕之存然薄技無堪恐難寓禁林之直固有令行而或反仰祈人欲之曲從所有上件恩命臣未敢祇受謹錄奏聞伏候勅旨

七月二十三日三省同奉聖旨不允

草晁公武詔書不當待罪奏狀

右臣近蒙聖恩擢貳秘書寓直翰苑臣自度荒疎愚戇加之素有心氣之疾難以攝視草之任嘗具辭免乞賜寢罷既而祇受不允之命微賤小臣未敢再有陳請只俟旦夕輪對冀得披露血誠今者果緣書詔輕重失倫

至勤御筆改定不職之罪合寘嚴誅萬一陛下海涵天
覆未忍遽加鈇鉞即乞改授在外宮觀差遣使得休養
心神循省愆咎干犯天威臣無任戰栗俟命之至謹錄
奏聞伏候勅旨

八月九日三省
同奉聖旨不允

求外劄子

左朝散郎試秘書少監兼權直學士院臣周其劄子奏
臣竊見近制卿監郎官率用實歷監司郡守之人蓋欲
更民事備任使也臣雖曾蒙恩差知南劍州除福建路
提刑然方赴而改未考治民之功前日陛下賜清問之
燕嘗具奏江西賦重民困間有寇盜當擇守令布宣德

化臣誠不佞欲望聖慈稽用更迭詔書畀之小郡使試
行其言自效尺寸於以少副陛下視內外器使人材
之意臣不勝幸願取進止

九月十五日三省
同奉聖旨不允

乞免學士院兼職劄子

左朝散郎試秘書少監兼國史院編修官實錄院檢討
官兼權直學士院周其劄子近蒙勅差兼史院實錄院
職事緣四朝國史及徽宗實錄事體重大非悉心竭力
考証同異尋繹事實無由可以下筆欲望朝廷特與敷
奏免攝內制職事庶幾一意本職不至闕誤伏候指揮
十月二十四日三省同奉聖旨不允

乾道七年

乞宮觀奏狀

具位臣周某狀奏右臣才質駑下一無可取方其少時
 弊精神於舉業因得心氣之疾間遇發作觸事差謬比
 蒙聖恩寘在冊府屢嘗自弛未奉俞音蒞職復踰半年
 猶冀圖報萬一而所苦浸劇寢食不寧外雖粗若可支
 中實難於勉強若不亟去殆將隕生欲望聖慈特賜矜
 憫改授在外宮觀差遣使得一意將理免至遂為廢人
 干冒天威臣無任戰汗之至謹錄奏聞伏候勅旨
三月七日
三省同奉
聖旨不允

乞改作時暫兼權兵部侍郎劄子

具位周某劄子今月一日準尚書省劄子節文三省同
 奉聖旨周某兼權兵部侍郎緣上職事元係太府少卿
 查籛兼權目今雖在建康府其兼職自合依舊欲望朝
 廷特與敷奏止令其時暫兼權候查籛回日罷庶幾事
 體為允伏候指揮
五月四日三省
同奉聖旨依

辭免權禮部侍郎奏狀

左朝散郎試秘書少監兼國史院編修官實錄院檢討
 官兼權直學士院兼權兵部侍郎周某狀奏右臣今月
 十九日準尚書省劄子節文三省同奉聖旨周某可除

權禮部侍郎日下供職者有命自天措身無地伏念臣
 空踈庸懦一無可取決科干祿本以代耕而陛下居
 潛邸已記其不腆之文暨登大寶首在拔擢之數恩私
 未報自投閒散比叨起廢愈被眷知蓬閣史闡禁林武
 部身兼數職莫匪清華雖陛下激勵疲篤每諭進擢之
 意而愚臣自揣才分屢控退休之辭今者成命驟頒聯
 榮禁路載惟蹇淺加以病衰玉帛鼓鐘猶未辨其名物
 而况秩宗典樂以和邦國乃使臣輩與聞其事豈不上
 累聖鑒下為清議所譏伏望陛下嚴近侍之選收已行
 之令俾臣姑安舊次亦足勉效其愚所有恩命未敢祇

受謹錄奏聞伏候勅旨

七月二十三日三
者同奉聖旨不允

辭免升同修國史實錄院同修撰奏狀

左朝散郎權尚書禮部侍郎兼權直學士院臣周某狀
 奉右臣準尚書省劄子七月二十四日三省同奉聖旨
 差臣同修國史實錄院同修撰通不出三員之數者殊
 渥荐加危衷增厲伏念臣本踈文藝尤乏史才攝事玉
 堂已慙於舊直計員金鑰更假於新榮名稽叙進之規
 實溢同升之數昔劉子元居秘書而領史事自矜又處
 於載言賀知章遷儀曹而兼集賢士論共榮其兩命臣
 學非二子而寵萃一時雖出誤知難安愚分倘不量牛

馬之走乃或冒熊魚之兼必噴煩言上辜洪造願俯從
於固避庶無負於曲成所有恩命臣未敢祇受謹錄奏
聞伏候勅旨

七月二十六日三省同奉聖旨不允

申省再辭狀

某近具奏辭免兼同修國史實錄院同修撰恩命準尚
書省劄子備奉聖旨不允者竊以編摩之職既嘗冒居
位序之升非敢多遜實以通計員數近無此例倘隳典
故懼速罪辜欲望朝廷再與敷奏許免上件兼職伏候
指揮

七月二十八日省劄檢會已降指揮不允

謝禮部侍郎表

臣某言伏奉告命除臣權禮部侍郎仍改賜章服者掌
秘府之圖書久玷英游之列奉甘泉之筆橐駝汗法從
之班恩厚踰涯感深次骨臣某中謝臣聞知人繇乎堯
哲分職著於周官明三德以有家所以撫五辰而凝庶
績佐六卿而率屬所以倡九牧而阜兆民何畏巧言其
惟吉士如臣者以一介甚疎之迹荷兩朝特達之知槐
市蓬山早塵華選烏臺鸞掖浸陟要塗嘗中返於江湖
亦旋歸於觀闕踰年於此片善莫聞心踧踖以不安顏
忸怩而罔措所期顯黜乃誤殊遷惟宗伯古之清曹惟
貳卿今之膺仕禮樂自天子出雖上稟於聖謨籩豆則

有司存當俯求於故實夫何鄙朴而許攝承夙夜直哉
惟清莫遂夔龍之遜文章煥焉可述更慙車馬之飛茲
蓋伏遇皇帝陛下冠古聰明御圖勤儉辨臣隣之邪正
昭示抑揚閔風俗之隳偷力加勸沮知臣雖無可用之
實察臣粗有不欺之愚特假寵榮俾陪亞旅臣敢不益
堅素守更厲丹心效守職之小忠詎塞論思之責竭事
君之大節或酬覆幬之仁臣無任

舉自代奏狀

朝散郎權尚書禮部侍郎兼同修國史兼實錄院同修
撰臣周其準今侍從官授訖三日舉官一員自代者右

臣伏睹左奉議郎直敷文閣寧國府司馬鄭伯熊學廣
聞多履方行粹俾聯華於禁近必振譽於寅清臣實不
如舉以自代

辭免兼侍講奏狀

具位臣周其狀奏右臣準尚書省劄子三省同奉聖旨
差臣兼侍講者成命初傳以懼以恐臣聞藝祖甫定天
下即召處士王昭素講易禁中兼訪民情真宗復置講
讀學士分直秘閣專備顧問列聖相承遂以宗儒重道
為家法自陛下握圖御極首闢齟禁命經筵官番宿其
中朝宣夕召殆無虛日博問勤詢罔匪治道蓋不特藉

其敷釋大義誦說舊聞應邇英故事而已臣以陋儒懵於經術叨陪禁從常懼不稱而况日朝垂拱可以告辰猷寓直北門可以備夜對使有萬分之補不待更參講勸也伏望曲回淵鑒亟寢兼官或特起逸民追開寶之盛或改畀時彥廣咸平之規使臣上不至妨賢下不失量力是陛下賜臣多矣孰與貪榮踰分之愧乎所有恩命臣未敢祇受謹錄奏聞伏候勅旨

九月九日三省同奉聖旨不允

謝侍講表

臣某言伏奉告命差臣兼侍講者王人多聞尚急詢謀之益儒者寡要况非殫洽之才望虎觀之深嚴負鵜梁

之愧慙臣某中謝臣竊以祖宗盛際講讀最親匪爵秩之攸拘惟英賢之是任上或處三公之舊下亦延九品之卑雖言語侍從之勞日計不足然緝熙光明之助職思其憂孰謂下臣可膺高選此蓋伏遇皇帝陛下有堯之聰明而靡忘稽古有禹之勤儉而力戒矜能六藝之文蓋皆見於行事諸儒之學豈足望於清光更資一得之愚使效萬分之補載考朝廷之制凡兼文館之官雖宰司提領之尊無內史訓詞之寵惟陪經幄必錫贊書蓋道既重則禮烏可輕而待之隆則報宜加厚臣雖極陋敢不深思區區傳註之間難規近效懇忠嘉之際

或厲遠圖臣無任

乾道八年

辭免書吳璘碑奏狀

右臣伏準尚書省劄子備奉聖旨差臣書吳璘神道碑者臣竊以書雖一藝亦惟素習乃工臣之不能衆所共悉倘或強其所短勤之豐碑深恐上無以稱陛下追寵勳舊之心下無以慰吳挺顯揚其親之意願回前命別付能者謹錄奏聞伏候勅旨

正月七日奉聖旨不允

乞免兼中書舍人劄子

臣昨奉聖旨以趙雄同知貢舉差臣攝行西掖文書臣

以時暫不敢辭避近者趙雄丁憂復令臣依舊兼權緣臣兼職已多才不能給決致瘵曠上累聖知今林機送伴來歸韓元吉已嘗攝事欲望聖慈免臣兼權取進止

二月三日奉聖旨依

謝宮觀表

臣某言昨奉聖旨與在外宮觀又奉聖旨今日下出門尋準勅差提舉江州太平興國宮任便居住者囊封初奏簿責隨加猶昇祠官示寬黜典臣某中謝伏念臣猥緣小技幾辱大恩當陛下應乾出震之初攝贊西臺之名命暨陛下祀帝崇親之際預裁中禁之詔書自當優

游乎文字之間乃敢僭率於封章之內再茲妄發可謂
數竒蘇、威命之行友、孤蹤之殆晨趨鳳闕縮五組
之光華夕侶漁舟被一簣之藍縷雖云去國尚爾全生
此蓋伏遇皇帝陛下御衆以寬退人以禮縱負丘山之
罪不加斧鑕之誅姑使汰歸俾知循省臣虛霑廩稍實
覲面顏身在江湖悵闕庭之浸遠心如葵藿望天日以
常傾臣無任

乾道九年

辭富沙乞宮祠第一狀

朝散郎新知建寧軍府事兼管内勸農使周某狀右某

近準告命授前件差遣尋準省劄備奉聖旨疾速前去
之任緣某舊有心氣之疾去歲以來發作無時觸事憤
忘舉措顛錯近日復中風濕左臂緩弱腰膂沉痛衆所
共見委實不能支吾難以冒應郡寄况起廢之由昨已
報行人：皆知聖朝公恕不棄一夫之意今來自以不
勝狗馬之疾乞投閒散揆之事理別無規避欲望朝廷
特賜敷奏再與宮觀一次它時有瘳別聽委使謹具申
尚書省伏候指揮

四月十日三省同奉聖旨不允依已
降指揮疾速前去之任仍具起發月

日申尚
書省

第二狀

右某昨緣疾病陳乞宮祠準省劄備奉聖旨不允依已降指揮疾速前去之任仍具起發月日申尚書省詔旨丁寧理難稽慢自合恭稟即時起發而所患浸加勉強不前須至再傾肝膽哀祈造化蓋聞難得者時當安者命如其不肖親逢聖主首被拔擢中雖流落簡記不忘頃再還朝寢躋華要每因燕見獎勵有加得時如此寧非至幸然自初政以來逮今一紀其間閒廢不翅十載常恨無階少殫犬馬之力茲叨鴻施起守潛藩宣化承流庶幾自竭豈應再三避免以干大戾其如命與時左事與願違心氣舊疾日甚一日腰臂痛楚通夕呻吟稟

生窮薄抑可知已若復不安義命輿疾涉遠大或斃踣道路小則遂為廢人仰揆寬仁必賜憐憫况某父名某適同府號縱禮律二名無避在人子終有未安伏望朝廷特賜敷奏令且食祠祿以便醫藥圖報天地父母之恩九殞無已謹具申尚書省伏候指揮

六月十日省劄檢坐不允指揮

及吏部供二名偏犯依條不合迴避催促赴任

第三狀

右某昨緣哀疾疊乞外祠屢準省劄未奉俞音已挾僊起發赴新任依已降指揮具申尚書省訖今至來隆興府豐城縣心氣大作顛倒昏忘見於言動服藥無效日

益羸困進則病勢如此止則通慢有誅重念其才力凡下無毫分可取誤蒙記錄畀之民社豈不思仰體宥過之意自詭治民之效不幸命薄病侵靡容勉強乞為敷奏特與宮觀一次使得專意醫藥異時圖報尚冀捐軀謹具申尚書省伏候指揮

九月十七日三省同奉聖旨不允

謝宮觀表

臣某言伏奉勅命差臣提舉江州太平興國宮任便居住者病辭假守方虞金木之誅恩與真祠曲荷乾坤之造危心頓釋感嗟載零臣某

中謝伏念臣蚤直龍飛首登螭陛出入雖周於一紀廢間乃閱於十年伊悔吝之

自貽益竒窮之素定比叨鴻渥寵畀潛藩非不知委寄之隆所願效承宣之力而臣命同才薄事與心違積困采薪之憂未臻勿藥之喜逡巡屢請荏苒三時黃香空任於宮臺難堪東郡汲黯懼填於溝壑敢薄淮陽迄誠悃之上通倏俞音之下逮此蓋伏遇皇帝陛下天臨海宇器使人材憐臣父負譴訶稍令起廢察臣實嬰哀疾復許投閒隆寬之施如斯力報之圖曷已臣謹當屏息衡茅之下精心香火之間殿天子之邦進莫陪於君子祝聖人之壽竊自附於封人臣無任

淳熙元年

謝右文殿修撰表

遯迹山林久隔闕庭之望寓名鉛槧驟參館殿之班
扳罪戾於墜淵交戰兢於維谷臣某中謝臣竊考聖代集
仙之職蓋稽唐朝麗政之規雖沿革之不同在寵光而
則一粵從紹聖復論譔以優去國之臣爰暨政和易名
稱以示崇儒之意寧許燭螢之質遙依奎壁之光伏念
臣初無他長而好自用辱上聖之知殊厚顧下愚之性
不移向非託命於乾坤久已投身於鈇鉞夫何顯職猥
及孤蹤戴盆方絕於望天豐節忽容於見日此蓋伏遇
皇帝陛下福威惟辟廢置馭臣爾自速辜夙示涵容之
度予其大賚更加藩飾之恩披肝不足以刑感激之詞
碎首不足以報生成之德重念臣周旋三館首尾六年
逮茲新渥之鼎來恍若舊游之夢到望屬車之臨幸敢
期犇走於英躔頌當宁之好文尚可矜誇於野老臣無
任

淳熙二年

辭免召命申省狀

某伏準省劄備奉聖旨召赴行在恩許賜環禮難俟駕
况遵近制辭避無從但以心氣怔營動成昏忘筋骸疲
憊良阻步趨審已再三理難自默重念某早塵華近誤

簡眷知去朝雖曰三年被寵殆無虛歲剖符鉅鎮既以病辭貼職書林乃茲冒受寬譴訶而已幸叨收召以何安伏望朝廷特與敷奏且令依舊宮觀差遣庶安愚分免速罪辜今來不敢稽留上命已一面扶病起發外謹具申尚書省伏候指揮二月十六日三省同奉聖旨不允依已降指揮疾速赴行在

到闕上殿乞郡或奉祠劄子

臣聞子牟心存魏闕望之意在本朝人臣愛君古今一也臣以匪才自陛下即位之初入侍殿陛褒揚遷擢度越流輩犬馬之心豈欲遠去左右其如迂愚窮薄自無補報之路重以心氣腰膂之疾日增月益分於聖世永

為棄物忽蒙收召感極涕零勉策衰疲來趨行闕既瞻天日之表申臣子之敬其於分願已為甚足伏望聖慈矜其無用憐其數竒且令依舊奉祠養疴田里或於江湖間試以支郡使之布宣聖德收養細民尚能少報天地父母之施區：懇誠實在如此干犯天威臣無任戰汗之至取進止

除待制辭免奏狀

右臣準尚書省劄子三月二十二日三省同奉聖旨除臣敷文閣待制待講者寵榮載集戰懼交懷臣竊以候對詒謨侍言宗政非簡求於髦士則優禮於耆儒豈伊

極陋之姿應此久虛之典伏念臣受才鄙朴殖學荒疎
 頃浸歷於清華殊未知於補報茲趨嚴召入覲威顏恭
 聽温言曲憐舊物諭選擇之有在謂精神之未衰而臣
 心志益凋文華弗競蓋嘗頓首香案之側復願養疴革
 門之中敢期酌用於故常特許追參於近侍自知非據
 人謂斯何仰冀睿明俯昭愚悃姑仍舊職改奉內祠如
 此則戀闕孤忠既容陳力而就列掄材盛典不至為人
 而擇官所有前件恩命臣未敢祇受謹錄奏聞伏候勅

旨

三月二十四日三省同奉聖旨不允

謝待制侍講表

臣某言伏奉告命除臣敷文閣待制侍講者寶儲邃密
 有嚴通籍之班聖學高明尤遴談經之選併茲虛授良
 以震驚臣某中謝伏念臣積冒恩私久辜任使既不能
 撥繁治劇服勞郡國之間又不能宿道嚮方宣力朝廷
 之上惟粗親於翰墨或小效於涓埃乃自中年適嬰哀
 疾詞源困涸言每出則謬悠心氣冥頑動不知其差誤
 顧在有為之世獨成無用之材私竊自憐分甘永廢豈
 謂伏蒙皇帝陛下如天之度徧覆無殊並日之明容光
 必照方旁求於多士不遂棄於一夫特許遙歸復令親
 近綴班聯於內閣奉清燕於邇英而臣竊窺太史之書

嘗考仁皇之世允釐近列登進名卿趙師民素號博聞
始兼是職呂公著力辭召試爰有此遷豈期勉出之孤
蹤亦用前修之故事乃文廣運固難措游夏之詞非道
敢陳所願論唐虞之際誓殫拙訥力報生成臣無任

舉楊萬里自代狀

右臣伏睹承議郎新差權發遣常州軍州主管學事兼
管內勸農事楊萬里居家孝謹從事廉方富於藝文可
備西清之訪遠於經術無慚重席之榮臣實不如舉以
自代

丐外劄子

臣以駑才蒙陛下異恩躡升次對專侍經幄坐縻廩稍
略無補報今既住講愈為素餐神惡僥踰累旬苦脾胃
之疾緣此心氣愈更虛乏若復不自引退必致別有災
屯伏望聖慈許臣以本官出守小郡奉外祠圖報生成
尚期糜隕取進止

六月十三日三省
同奉聖旨不允

辭免兼直學士_院奏狀

右臣準尚書省劄子三省同奉聖旨差臣兼直學士院
者錫命頻仍省躬震惕伏念臣早緣薄技誤簡淵衷粵
自初元首叨入侍日來月往莫殫千一之愚天施地生
乃辱再三之召尚復眷憐而不已每於任使以有加顧

仙嶺之提鰲自存大手矧明庭之儀鳳方集竒才寧容
 圭竇之人重寓金鸞之直是敢知難而自列仰祈遷令
 以旁招所願專心誦聖謨於經幄毋令越職妨賢路於
 禁林所有恩命臣未敢祇受謹錄奏聞伏候勅旨
九月
 日

三省同奉
 聖旨不允

辭免兵部侍郎奏狀

右臣準尚書省劄子節文三省同奉聖旨除臣兵部侍
 郎日下供職者褒遷過分震懼靡寧臣竊以本朝置侍
 從官特異前代蓋欲其精白一心論思獻納增重王國
 非專使治有司之事而已自元豐改官制雖稍循周唐

舊典分治六曹然班列浸高職業猶簡委用之意夫豈
 徒然若是夏官尤號清選臣以凡庸之質荷特達之知
 五年之間兩兼攝貳畧無補報有玷周行至於寓直禁
 林執經崇政最為華近今悉冒居陛下虛心以求議論
 而臣喑無一言陛下勵精以集事功而臣懦不舉職尚
 寬汰斥已足保全復用何名更叨真拜而况早來奏對
 之際備聞天獎雖未披於心腹已灼見其肺肝伏望聖
 明矜其自量非敢飾避特反惟行之令誓堅圖報之心
 所有恩命臣未敢祇受謹錄奏聞伏候勅旨
九月六日
 奉御筆批

降詔
 不允

不允詔

王淮撰

勅某省所奏辭免除兵部侍郎恩命事具悉文昌六
 職實聯兩禁之華夏官戴卿兼總五兵之政屬時右
 武宜得周才肆圖厥庸式叙乃位卿問學優於游夏
 詞章過於卿雲自隆興之初元以柱史而入侍屢罄
 論思之益尤推潤色之工擢寘經帷再升詞禁爰從
 容而造膝嘗密勿以沃心嘉爾靖共副予虛佇乃即
 司戎之任就頒命綽之榮奚必固辭並祇乃服所辭
 宜不允故茲詔示想宜知悉

辭免兼侍講奏狀

右臣準尚書省劄子節文三省同奉聖旨差臣兼侍講
 者絲綸參集淵谷是虞伏念臣頃自召還親蒙簡擢酌
 本朝待儒先之禮以次對專講勸之官今既進貳夏卿
 仍聯翰苑若尚續漢殿六經之業殆將兼唐人三侍之
 榮所憂仰累於殊私不獨自慙於非據願廓燭幽之鑒
 別求詔媿之賢恭冒聰聞伏需報可所有恩命臣未敢
 祇受謹錄奏聞伏候勅旨

閏九月十日奉御筆批降詔不允

不允詔

勅某省所奏辭免侍講恩命事具悉朕古訓所師惟道
 德是企多聞雖益以直諫為先卿強學力行愛君憂

國日在西清之邃熟陳前席之謨今茲侍經是謂申命亟宜祇若摠入室之微言何用抗辭事循墻之曲謹所辭宜不允故茲詔示想宜知悉

謝兵部侍郎兼直學士院表

臣某言伏奉告命除臣兵部侍郎依舊兼直學士院仍賜對衣金帶者通班內閣已塵次對之華列屬中臺復冒亞卿之寵申命鑿坡之直增光禁路之游稽首拜嘉省躬知愧臣某

中謝

臣竊以司戎任重視草才難自非

文武之兼資曷副國家之遴簡歷考正元而後惟陸贄衛次公之並克載稽南渡以來有汪藻綦寔禮之故事

如臣末學難企前修徒夙幸於遭逢獲徧儀於清要愚蠢倥侗之性每辱照知荒唐駝駝之詞數蒙嘉獎首尾纔經於五載攝承兩贊於七兵未嘗萌久假之心矧敢覲為真之命橫黃金之帶驟拜新榮上白玉之堂更仍舊貫大恩所被小已奚堪此蓋伏遇皇帝陛下剛健時行緝熙日就運堯帝之德而奄有四海方懋乃聖乃神之功立周王之政而灼見俊心不輕常伯常任之選孰知懦緩叨此詔除况資翰墨之所長尤非疲駑之可稱臣敢不竭其忠益濟以靖共體元豐肇正於官名願效論思之實念開寶初增於禁直勉圖潤色之工萬分可

酬九殞何憚臣無任

舉劉清之自代狀

右臣伏觀宣教郎新知撫州宜黃縣主管學事勸農營田公事劉清之乃本朝名臣劉敞劉敞之從曾孫篤學好修臨事不苟向者劉珙在樞府欲與相見即加論荐清之嫌於自衛竟不肯往乾道九年秋用舉主考第改官嘗有旨同張駒召赴都堂審察清之獨赴部注知縣而去廉退如此近侍所稀舉以代臣實允公議

歷官表奏卷第一終

歷官表奏卷第二

周益文忠公集一百二十三

淳熙二年

謝侍講表

臣某言伏奉告命除臣兼侍講者一趨經席已稱韋布之榮參備綸言豈厭搢紳之望凌兢祇命俯仰懷慙臣其中謝臣竊以天縱之能陋儒絕企日躋之聖典學何加然且躬有虞好問之勤守大禹不矜之戒正使昔人之博洽尚難稱於在前矧如淺識之支離顧何堪於拜下而臣逢時千一冒寵再三曩聯南省之班嘗執經於累月比候西清之對復隸職者半年逮此叨踰愈為榮

幸茲益伏遇皇帝陛下聖而益聖新以又新舒兩曜於天衢猶許螭螢之曳納百川於溟海不辭潢潦之歸是使顓蒙荐陪誦說臣敢不欽承異禮勉竭孤忠無力可陳雖未觀於實效有猷則告庶少塞於空餐臣無任

辭免兼詹事奏狀

右臣準尚書省劄子十月十八日三省同奉聖旨差臣兼太子詹事者錫命自天措身無所臣竊惟儲端華重今昔所同漢韋賢質朴篤學始膺委任唐李勣至以舊長史屈階資而為之近歲以來非老成端諒卓然為世所推則必於近臣中擢嘗任王府講讀及宮僚者就兼

是職苟或異此寧虛厥官如臣不肖行能淺薄既無素望又非舊人驟預選掄實駭群聽此臣所以彷徨震怖不敢自恕而但已也伏望陛下重青宮之屬軫黃屋之思勿以反汗為難而以掄材為急朝多英望亦有舊僚改而命之庶協公論冒輪懇悃必冀矜從干犯宸嚴臣無任屏息待罪之至謹錄奏聞伏候勅旨

不允詔

權中書舍人程大昌被旨撰

勅某省所奏辭免兼太子詹事恩命事具悉朕簡宮僚非正人不與卿踐端尹迺衆論所宜攬觀推遜之言其詔早收之意李勣之屈資受委曰求舊則有之

綺里之偉冠從游亦博致為貴矣其務究思於輔翼
是云有益於元良豈必辭榮始名美德所辭宜不允
故茲詔示想宜知悉

東宮賀冬牋

某言伏以漢朔無差上應太初之神策堯年有永載隆
德壽之鴻名允哉二極之賢同此兩宮之慶某誠懼誠
抃叩頭叩頭恭惟皇太子殿下位尊儲副德茂元良雷
復地中契義文之游震日行巽軌符漢樂之重光剛以
朋來福繇類至某甫趨鶴禁欣贊羽冬南極景長願從
容於五學少陽道長知消伏於群陰謹奉牋稱賀以聞

某誠懼誠抃叩頭叩頭謹牋

淳熙三年

東宮賀正牋

氣動青煒肇布發生之德地居蒼震密參化育之功履
茲端月之和篤我儲儀之慶中賀恭惟皇太子殿下象
符明兩朝謹日三龍角連杓陪龍樓之元會鷄鳴列戟
擁鷄旦之殊祥令名烜赫於金昭淑氣充盈於銀榜某
謬依春誦倣改歲華卉木維萋喜詠遲之之日根莖咸
遂願歌湛之之祺

祭社祝文待罪劄子

三月一日

臣近撰祭告大社祝文誤引春秋用牲伐鼓故事委是不職見候守局退即便歸家待罪伏望聖慈特賜罷斥臣無任戰慄俟命之至

三月二日三省同奉聖旨今日下依舊供職

謝宣諭劄子

臣學識淺陋文詞鄙拙上章自劾祇俟嚴誅伏蒙陛下天覆日明兼容委照特降睿旨令臣日下依舊供職仍於執政處恭聆聖訓仰惟君父之恩如此其厚豈臣么麼所能報塞誓圖糜隕少効萬分臣無任感激惶懼之至謹具劄子奏謝伏乞睿照

辭免轉官奏狀

右臣準吏部牒備坐三月十五日勅節文以臣昨任秘書少監經修太上皇帝日曆見在行在供職合特轉行一官者臣竊以如虞二典述三紀之成功為宋一經對兩宮之曼壽凡經執簡特許進階而臣頃以謏才謬參少令譔次雖叨於滿歲荒疎何補於編年逮趣上於奏篇遠再塵於禁路窺一斑而在列已幸榮觀傳副墨以策勲敢當醲賞是殫誠悃仰瀆睿聰如其考績而陟明固難飾避若乃無功而受祿實不皇寧願亟寢於誤恩庶少安於愚分謹錄奏聞伏候勅旨

不允詔

三月二十五日奉御筆批降詔不允

勅某省所奏辭免經修太上皇帝日曆特轉行一官
 恩命事具悉作堯帝之典具載放勳之功薰班史之
 香迄定漢家之制肆成書之上徹寧褒渥之敢稽卿
 文力得於天成藻思沛乎泉涌自頃彩纓於少令固
 嘗執簡於編年兼才學識之三長備存緗素參月日
 時之四繫甫畢汗青逮茲懋賞之行歷考當時之彥
 顧今在列之有幾豈吾近臣之可遺宜亟體於朕懷
 往祇服於新命所辭宜不允故茲詔示想宜知悉

辭免書韓世忠神道碑劄子

右臣準尚書省劄子備奉聖旨差臣書韓世忠神道碑

文者臣仰惟陛下親御翰墨大書世忠碑額非特寵綏
 韓氏亦將丕勸勳故譬之龍蟠鳳翥昭回於天豈容春
 蚓秋蛇附見其下伏望聖慈特賜追寢別擇能書者而
 命之臣不勝幸願謹錄奏聞伏候勅旨
四月三日三省同奉聖旨不允

繳書神道碑劄子

臣先奉聖旨差臣書韓世忠神道碑文今已寫成一軸謹
 以進呈惟是字畫非工無以仰副陛下追褒勳舊之意
 實深震懼伏取進止
八月二十三日奉聖旨降付本家

辭免潤筆劄子

臣今月二十九日得戶部侍郎韓彥古劄子以臣先奉

聖旨書其父韓忠武王世忠神道碑送到金器二百兩
充潤筆雖云躬承睿訓繼奉御筆許齎賜然臣義有未
安須至奏免臣竊考自古人君追褒勲賢多命儒臣紀
載事實必有濡潤用酬撰述之勞至於書丹本是待詔
職事近年乃出土大夫之手仁宗時偶因御製元舅隴
西郡王碑文詔蔡襄書之襄以御製不敢辭避其後詞
臣別有所撰又命襄書襄即懇免臣書札素非所長昨
命為韓氏寫碑正緣陛下追念勲臣大書碑額臣輒以
蔡襄故事不敢固辭今若違前世所無之規循近年冒
受之例則不惟捨是從非取誚公論亦恐傷廉苟得上

負聖知伏望睿慈察臣悃悞恕臣冒瀆特降指揮許臣
免受取進止

奉御筆批依例
收受不須懇辭

謝劄

臣昨具奏辭免韓彥古賫賜書碑潤筆金器二百兩恭
準御筆令臣依例收受不須懇辭臣伏讀以還實深感
懼因思自初差委及今送遺皆出陛下之意臣豈不知
若復控辭祇成煩瀆即已遵稟聖訓祇受訖予惟馭幸
誠戴於上恩取或傷廉終慙於物議尚推隆施期報洪
私臣無任激切惶恐之至謹具劄子奏謝伏乞睿照

辭免陞兼侍讀奏狀

右臣準尚書省劄子節文九月二日三省同奉聖旨周
某陞兼侍讀者誤膺褒渥伏積兢惶臣竊以入侍邇英
均為清近然而進讀之選重於執經多處大僚間優宿
望如臣者猥繇孤賤蚤被簡知首尾六年三陪講席無
一詞發揮經訓無一事裨贊聰明內愧心顏外貽譏誚
豈可偶因官闕更冒次升人以為榮臣以為懼伏望皇
明日照聖度天容察臣非才恕臣量已別選在列廣求
多聞毋令陋儒益壅賢路所有恩命臣未敢祇受謹錄
奏聞伏候勅旨九月六日三省同奉聖旨不允令學士院降詔
不允詔

勅某省所奏辭免陞兼侍讀恩命事具悉朕惟祖功
宗德炳若日星聖烈神謨垂之琬琰每懷仰止常切
慨然思得崇閣博碩之儒庶資論說指陳之要卿識
周治本學探道原經幄誦言稔直諒多聞之益禁林
視草挾溫厚爾雅之文爰陞進於露門益發揮於寶
訓昔司馬侍邇英之讀具陳變法之規蘇軾兼金華
之榮亦著六事之美其毋多遜式企前修所辭宜不
允故茲詔示想宜知悉

謝侍讀表

臣某言伏奉告命陞兼侍讀者執經克數未絕業於金

華進讀升班首侍言於帝幕拜恩加厚省已何安臣某
中謝 臣聞選儒士以質疑本唐室開元之際閱史編而
顧問在皇朝興國之年肇立官稱助成治道矧明主夙
勤於聖學舉羣官難歧於末光凡陪清燕之遊尤號高
華之選縱未得故老宿儒之重入告於辰猷尚當求洽
聞博物之英少資於晝訪接豈臣孤陋堪此褒遷茲益伏
遇皇帝陛下文武生知聰明日就二帝三王之行事久
矣優為六經諸子之格言居然深造更思愚者之慮固
伏小人之箴故雖非重席之才亦許冠細旃之列庶因
駿骨或致龍媒臣敢不圖報洪私益堅素守典墳能讀
深慙倚相之良仁義以陳勉效孟軻之敬臣無任
辭免吏部侍郎奏狀

右臣準尚書省劄子節文十二月二十四日三省同奉
聖旨周某可除吏部侍郎自下供職者寵命過優震惶
失措臣竊惟六官置貳職任俱隆有唐三百年暨本朝
元豐以後或隨材互轉或因事遞遷固有周歷列曹亦
有自戶禮而轉兵刑者旋觀歷試倚重則均矧是東銓
古稱小宰選掄既遴位序益高豈伊妄庸堪此隆委伏
念臣蒙陛下識拔最早叨陛下爵祿最厚而才力議論
比之在廷諸臣最為無取再塵武部僅及一年有半之

故事未為久次加之身兼三組備極清華內揆非才不
皇寧處豈謂驟膺簡擢進預銓衡抑揚之間聖主所當
致審辭受之際微臣敢不自量伏望陛下深亮懇誠無
嫌改命別求精鑒俾佐治官免貽非據之譏仰累知人
之哲所有恩命臣未敢祇受謹錄奏聞伏候勅旨

不允詔

勅某省所奏辭免除吏部侍郎恩命事具悉朕惟六
卿貳列其選固皆不輕然武部典掌五兵而職或優
暇小宰銓叙群才而事多叢委與其蓄餘蘊而處優
暇之地孰若升劇寄而資鑒裁之公哉卿資之所稟

者既高學之所養者益富代言禁苑進讀露門翊東
儲而列西銓四職並舉而沛乎其有餘裕肆是命卿
參吾典選之政令庶藉其通明以清流品推其精敏
以扼姦欺用稱吾綜核之意其何以辭為也所辭宜
不允

謝吏部侍郎表

臣某言伏奉告命授臣試尚書吏部侍郎仍賜對衣金
帶者嚴近叨居夙負瘵官之責武文迭試更膺換部之
榮襲衣頒在笥之珍寶帶錫章身之寵仰慙主眷俯愧
輿言臣某中謝臣聞古之銓綜存乎人今之銓綜一於

法存乎人固可以得士然其弊也常由予奪之不公一
於法固可以減私然其弊也或致賢愚之同滯而况簿
書紛若胥吏雜然苟稽察之弗精將混淆而莫辨欲酌
古今之中制當令人法之並行庶稍戢於吏奸亦少伸
於士氣豈容虛授以累明揚伏念臣性鄙習迂志卑才
下蚤親翰墨為書生陳腐之談久侍軒墀初乏禁從
論思之語引去則殊私之未報欲留則高位之難安方
進退之靡寧忽選除之下逮肺腑抱履冰之懼面顏形
槩市之羞被此光靈若為稱塞茲益伏遇皇帝陛下乾
行不息日照無私知人非堯帝之難巧壬奚患選衆有
皋陶之舉枉直自分夫何一介之臣乃冠貳卿之列臣
敢不遵承法令振拔滯淹雖微冰鑑之明上裨睿哲姑
守權衡之信仰助公平苟不辱知斯為報國臣無任

舉白代奏狀

右臣伏見朝散郎守尚書兵部郎中賜緋魚袋蘇諤修
身有家法臨事無私心即省二年靖共厥位臣在夏官
久與同僚備知其人臣實不如舉以自代

請外劄子

四月二十六日請對既至漏舍疾作不曾上

臣自蒙聖恩召還禁路遷擢再三未有絲髮可報生成
之造豈應輕為去就辜負聖知緣臣有迫切之懇須至

披露於君父之前伏念臣少孤多難依諸父以自存臣之叔有二子自來同居前年臣到闕之時季忽夭折尚餘其長未至狼狽不謂三月間又復即世兩房嫠婦幼子全闕撫養臣欲挈取以來則二千里之遠勢不能辦若置而不問則於心豈能自安晝夜忖度莫知所措惟有乞奉外詞可以少致私義伏望聖慈憐臣受祿過分事出意表察臣受恩方厚情非獲已特降睿旨俯從所請糜捐之報尚冀它時干犯宸嚴伏俟誅戮取進止

吏部侍左進天申節功德疏右語

三紀施仁固獲延年之報萬方懷德矧多祝聖之人茲當虹渚之昌期載演鷲峰之密義尊號皇帝伏願雍容太極覆燾含生福等河沙誠非算數之及壽同無量永作人天之師

東宮賀冬牋

周統得天布時王之正朔漢如迎日對元祀之祺祥允符陽德之亨虔致震宮之慶中賀恭惟皇太子殿下道隆三善瑞應重光泰時親祠既已儲休於上聖貳觴嘉獻自宜介祉於元良與國無窮如天有永其會逢亞歲託備下僚輔翼無功虛度舒長之圭影往來有象願觀動靜於天心

淳熙四年

東宮賀正牋

星回於天載測璇璣之度王省惟歲重頒寶曆之春萬
宇咸熙三宮交慶中賀恭惟皇太子殿下內全仁孝外
備溫文日就月將德與年而俱永天長地久福暨祿以
偕昌邁監撫之前聞契壽減之善頌某欣逢令序延跂
規丹鳳度趨方參聯於百職執銅龍祇謁尚續罄於多懼

辭轉官奏狀

右臣準尚書吏部牒備奉三月二十四日勅以臣經修
徽宗皇帝實錄見在行在供職特轉行一官者無功假

寵有覲在顏伏念臣頃以庸虛叨塵史職空更歲月莫
施鈇槩之勞茲者偶值奏篇例當進秩揆之公論咸謂
過優在於私心實難冒受伏觀况樞臣懇避宸旨賜俞雖
則名位不同不當援以為請然昔人謂范宣子遜其下
皆遜樂廩雖汰弗敢違也今臣縱乏晉卿之義豈不思
自附於廩乎伏望聖明矜其誠悃非備禮而辭者特詔
攸司追寢前命庶幾賞行不僭抑使愚分獲安冒犯天
威臣無任惶懼戰汗之至謹錄奏聞伏候勅旨

不允

奉御筆
批降詔

不允詔

勅某省所奏辭免經修徽宗皇帝實錄特轉行一官
恩命事具悉惟昔徽皇撫時熙運繼六七作之聖業
鉅事叢成二百篇之書文直義核茲覽編年之善具
嘉秉筆之工凡預纂修靡遺褒錄卿才追遷董藻揆
卿雲紬金匱石室之藏居多論載迄汗簡殺青之業
綽有勞能逮此奏篇於烏第賞而乃慕范宣子之義
巽以成風師正考甫之賢恭而有禮雖高謙益難遏
渙孚所辭宜不允故茲詔示想宜知悉

辭免翰林學士奏狀

右臣準尚書省劄子五月二十八日三省同奉聖旨除

臣翰林學士日下供職者起遷過分震懼靡寧臣竊以
列職禁林本朝所重陛下聖學天縱宸文日新故於此
官尤不輕畀竊計十六年間除授總五六人可以知其
選矣如臣見聞單淺翰墨荒唐誤簡異知徧塵華貫一
自攝承視草首尾僅及六年適有天幸再逢加上德壽
尊號兩經郊祀大禮制誥典冊往涉筆其間是皆當
世儒先跂望而不可得者臣獨有此榮遇日夜惴恐自
知無以稱塞比因入對反誤褒嘉且復再三諭以因文
字進擢之意臣方踧踖退避翼日已奉除書雖陛下崇
獎詞臣務隆恩渥在臣分量盈溢實非所安而况寓直

於中足以効薄技賦祿之厚固已視真除何必捐父虛
之官重至愚之累此臣所以不避煩瀆而為是諄：也
伏望聖慈俯昭誠悃特寢成命姑即銓衡之舊仍宣潤
色之勞圖報大恩有隕無貳所有恩命臣未敢祇受謹
錄奏聞伏候勅旨

奉御筆批
降詔不允

不允詔

權直院程叔達撰

勅某省所奏辭免除翰林學士恩命事具悉朕惟禁
林夙號真清學士尤為妙選蓋命令之發將以鼓天
下之動而播告之修於以見王者之心非高其才者
曷擅斯長非裕於學者曷勝茲任卿斧藻其德圭璋

乎文翰墨舊游嘗屢參於潤色典冊大筆仍多自於
財成灑聖鎔冶乎詰盤溫厚輔轅乎漢魏倚金華而
上白玉久勤寓直之勞遡太清而凌紫霄爰即為真
之拜除音一下僉論允諧宜亟體於眷懷胡尚形於
巽避所辭宜不允故茲詔示想宜知悉

宣召節次

至日絕早待詔客位坐伺候內翰近出廳待詔先至
面南香案側立請內翰出笏至香案前面南立引接
唱躬身兩拜起拜訖且躬身有勅聽待詔讀口宣畢
再兩拜起直身搢笏引接供過謝宣召奏與內翰即

過與待詔却過與表奏官通進司投下引接虛喝依
例待詔馬下錢一十貫近例不曾喝引接喝內翰馬
到請內翰乘馬後待詔乘馬宣押入皇城門至院中
到臺下馬引接雙引明廊喝內翰來至堂內升座引
接兩邊立第一喝王從 已下躬身應諾聽喝各祇
候再應喏退第二喝劉大聲已下躬身應喏聽喝各
祇候再應喏退第三喝待詔躬身應喏退畢內翰起
親事官接公裳歸閣子

口宣

有勅卿文詞瞻蔚學術純深擢位禁林斷繇朕志宜
因剛日亟服殊休今差忠翊郎待詔錢滋宣召卿入
院克學士想宜知悉

謝宣召入院表

右臣今月十三日忠翊郎學士院待詔錢滋至臣所居
奉宣宸旨召臣入院克學士者君命及門趨正鑿坡之
直玉人馳騎驟增蓬戶之光在稽古以何功繫蓬辰而
有幸瞻威咫尺流汗再三伏以地重禁林職專內制唐
朝全盛初置院以名官聖代承平尤隆儒而假寵諮報
施於政省勅設具於大官霜日冬嚴候五輒而入直暑
風夏永盡三伏以蚤歸凡茲異數之加絕匪群司之比

竭從南渡重啟北扉仍每厚於恩章示無忘於典則賜
玉堂之篆已追淳化之風揭擣文之名更用政和之制
佩服煥兼金之飾宮庭還雙導之儀地既近而職親俸
良優而事簡惟重其官則擇人也審惟尊其禮則責報
也深凡政事之否臧若兵民之利害大而除授於將相
次則討論於古今皆因燕閒得以獻替諒非鴻博難預
選掄如臣者骨相多屯才華弗競所宜遊迹躬耒耜於
田間何意代言鼓雷風於天上誤結九重之眷冒膺三
入之榮居慙起草之非工寧復為真之敢望茲益伏遇
皇帝陛下聖謨獨運睿智日躋煥乎文章紹則天之堯
帝倬彼雲漢邁作人之周王既集大成尚收小技臣謹
當推原德意播在訓詞雖愧百篇垂坦然之帝制或令
萬姓識一哉之王心臣無任感恩荷聖激切屏營之至
謹錄奏謝以聞謹言

謝表

臣某言伏奉告命授臣翰林學士知制誥以今月十四
日朝謝訖者佐銓南省已辱超遷裁詔北門更膺宣召
絲綸寵甚簪黻榮之伏念臣名習藝文實疎學業竊方
流輩最軫眷憐兩制清華並叨於再直六曹要劇五攝
於貳卿積有恩私畧無補報窺陳篇而盜竊懼干聖主

之誅奏薄技以精思愧忝從官之內敢期宸渥真踐禁
扉此益伏遇皇帝陛下欽明文思剛健中正學古多聞
乃有獲發號施令罔不減何取顯蒙亦令親近臣敢不
勉殫愚鈍仰答聖明視淮南之書豈但矜誇於下國聽
山東之詔固當裨助於中興臣無任

舉自代奏

右臣伏見承議郎權江南西路轉運判官趙汝愚奉親
孝謹勵志忠清方陛下作成宗支汝愚首以文學超冠
多士分符持節又皆底績若寘詞禁足為國華臣實不
如舉以自代謹錄奏聞伏候勅旨

謝衣帶鞍馬表

臣某言伏蒙聖恩以臣朝謝賜臣衣一對金帶一條并
魚袋金鍍銀鞍轡馬一匹者竒衣有煥束以九環坳牡
甚良分之六轡被躬雖寵稱德多慙伏念臣乏黃絹之
辭起白駒之谷褐衣褐見莫陳漢成之便宜馬去馬歸
敢計塞翁之倚伏竊尋唐事獨貴詞臣候對於受宣之
時拜恩於就宴之日服頌內庫駟假飛龍蓋嘗夢想於
儒榮豈謂親承於聖澤此益伏遇皇帝陛下解衣待士
馭朽臨民垂虞舜之裳坐安天下市燕昭之駿期致賢
人故假服章以華駕鈍舉一箱於家廟莫追親膝之歡

盛七事於禁林徒荷君恩之寵臣無任

右制誥表章一卷錄寄顏頤二從孫為他日齊飛入禁林之勸尚期勉旃期無愧於古人勿効叔翁不學少文徒能依本畫葫蘆耳淳熙四年六月十五日

先公除翰林院制誥表章題曰鑿坡錄今誥詞已載年譜表章又入此卷故附見跋語於後云綸謹書

歷官表奏卷第二終

歷官表奏卷第三

周益文忠公集一百二十四

淳熙四年

辭免兼修國史奏狀

右臣準尚書省劄子節文七月二十七日三省同奉聖旨差臣兼修國史者揆才非稱聞命若驚竊惟建官以六大為先實尊載筆作樂以一變而足所貴專門若時聖代之信書方藉春卿之精識時季燾以禮侍同修國史明是非於五紀昭功德於四朝自非荀袁鴻雁之行寧備遷固馬牛之走如臣者含毫無取濫吹有年紹興是正書林嘗參於編次乾道躋攀禁路復貳於纂修逮茲三入之榮

厚甚九重之眷然而叨塵數職懼力難任度越宿儒隱心尤愧伏望陛下擴大明而委照矜小技之知難成書專屬於名家虛次姑仍於舊貫免令尸素反滯汗青干犯宸嚴臣無任震懼俟罪之至謹錄奏聞伏候勅旨

不允詔

勅某省所奏辭免兼修國史恩命事具悉甚矣夫史筆之難也以馬遷之良才而是非頗異於聖人以韓愈之碩學而竄定迄無於全篇自非一代儒英兼備三長者未易稱其選也豈無若人足以矯斯弊而擅斯美哉卿博極羣書尚友千古其於文學才識固已

淵渟涵蓄於胸中而施之論思潤色之間亦已沛然其有餘肆是命之兼典史事庶幾交輝並映筆削財成作宋一經高視漢唐而無愧推遜之章過形謙避雖嘉冲尚殆難徇夫雅懷也所辭宜不允故茲詔示想宜知悉

舉李塾賢良不應格待罪劄子

臣昨任敷文閣待制日曾同王淮荐舉眉州布衣李塾堪應制舉後來王淮為執政其李塾詞業係臣繳進緣止蒙恩召試今聞李塾所試六論率不應格無以副陛下孜孜求士之意罪無所逃欲望聖慈特賜紕責以懲

謬舉取進止

九月三日奉御筆放罪

東宮賀冬牋

氣運環周雖分二至古今交慶獨在一陽偉儲德之又
新紛休祥之參集中賀恭惟皇太子殿下挺姿岐嶷率
性溫文學常愛於日舒道每符於剛長漢殿八能之會
祇率群公魏基三世之言永扶昌祚天人有相福祿無
疆某叨侍承華載逢令旦其為欣頌倍萬常均

淳熙五年

東宮賀正牋

玉燭時和方肇臨於首序銅樓氣淑淑宜交集於殊禧喜

浹宮庭慶均家國中賀恭惟皇太子殿下聰明異稟仁
孝夙成在宮曰春助發生於天地於卦為震收簡易於
乾坤竊嘗推類以求端益信對時而受福某久陪漢苑
載值夏正因頌詠以輸勤越等倫而竊抃

乞郡劄子

臣某輒控愚誠仰干天聽臣一介庸妄初乏寸長陛下
陶成獎擢有年於此寅緣忝冒遂塵翰苑清資駢組極
儒生之榮遇而臣文辭鄙朴既無以潤色皇猷議論
怯又無以裨補聖治妨賢竊位辜負眷知慙慙熏心
忸怩健忘凡遇撰述殊覺窘艱又今侍從近臣皆曾經歷

州縣獨臣超躐過分未嘗服勤於外每一念此尤不皇
寧而况再侍軒墀首尾四載稽參故實亦當從更迭之
制疊是三者懷不能已躊躇浸久乃茲有請非敢輕為
去就而無犬馬之戀也伏望陛下博施鴻造洞照孤衷
特指小郡試以民事使其心粗安則病或愈任稍輕則
力可彊銜恩報德中外何殊冒犯威尊伏俟鈇鉞取進

止

正月二十五日奉
御筆批降詔不允

不允詔

兼權中書舍人劉孝題撰

勅某省所奏劄子乞特指小郡試以民事具悉卿以
粹美之資蚤膺文學之選晉登詞禁益鬯聲華以潤

色則素長以議論則甚偉凡自託於不敏皆汝為之
有餘况兼疊組之榮方極一時之遇胡為劄奏力詭
治民夫意在本朝如蕭望之願為中郎若汲長孺皆
篤愛君之義不以居郡為多矧卿眷倚優隆職任親
近其體昔人之志毋懷外補之安所請宜不允故茲
詔示想宜知悉

再乞外任劄子

翰林學士朝議大夫知制誥兼侍讀兼太子詹事兼修
國史臣周某劄子奏臣近披誠懇控告君父乞乘一障
少効駑力伏蒙陛下訓獎再三諭使安職玉音濬發蹇

訥自窮繼頌溫詔曲示優禮臣草芥微生何以仰稱天
造感悰既極哀涕自零豈應固守不移之愚身投砧質
緣臣辭有未盡不免觸冒萬死再塵淵聽竊以職親地
禁參被諮詢非嘗更歷中外未易當此高選其居之者
亦以高官厚祿往：不敢為久安計前代故事難於徧
舉姑以本朝觀之德望如李迪猶歷永興軍陝西都轉
運使而後用文未如陳堯佐猶數典名城四為職司而
後入又如歐陽修在此職乞洪州者七狀蘇軾數月間
乞守越者八章載在史冊蓋可覆視今臣於民情吏事
全不諳曉而冒居華序淹引歲月既憂顧問之際語塞

獲譴又恐久妨賢路招致人言是以朝思夕慮審而後
發陛下明並日月必賜矜照且人臣不自安於朝廷之
上者其說有二若非明主厭薄慮貽罪斥則或多結仇
怨讒嫉是虞今陛下待臣方厚獨專內直臣亦素不預
事與人無怨於茲有請竊謂無嫌此外實懷私心不敢
輒隱臣本章句腐儒其初志在一第金華玉堂夢想弗
及豈期遭遇併此冒居兼數年以來遷擢頻數常懼踰
涯別致灾咎冀因外補少逭隕越言而非實是謂欺君
縱陛下容而恕之神明亦將致殛矣意迫辭煩仰祈賜
可干犯疏宸臣無任戰慄俟罪之至伏取進止

正月二十七日

文瑞樓

奉聖旨依已降詔不
允不得再有陳請

奏謝劄子

臣昨再具奏乞從外補準尚書省劄子備奉聖旨依已
降詔不允不得再有陳請臣仰銜眷遇感深涕隕已恭
稟聖訓依舊供職俟他日請對別叙戴恩引分之意謹
先具劄子奏謝伏乞睿照

再乞去劄子

閏六月十四日

臣輒披誠悃上瀆宸嚴臣受材至下賦分至薄而叨被
眷憐至厚嘗懼無以報塞自貽罪戾近於五月四日懇
祈外補少逕隕越玉音眷留備極恩意臣感戴殊私深

願竭力文字間圖報萬一而臣舊苦心氣之疾近忽大
作悸眩虛乏終日困卧遇有書詔思索移時不能下筆
將何以潤色皇猷上副睿獎夙昔南自省實不皇寧重念
臣間因奏對每及久任謂祖宗時為學士者常至數歲
亦有踰一紀者以此見聞臣非不戀清華之直企前輩
之風但文翰之職精思為主今臣福過災生罹此疾恙
既妨思慮遂曠職業雖欲冒尸榮祿勢不可得欲望陛
下特賜矜憫畀臣一待闕小郡或在外宮祠差遣冀憑
天造休養療治他日倘或有瘳尚能歌誦聖主之功德
以畢微願干犯鈇鉞臣無任跼蹐俟命之至取進止

不允詔 權中書舍人陳騫撰

勅某省所奏劄子乞一待闕小郡或在外官祠差遣
事具悉朕聞制誥每下人皆謂其溫厚純雅有典謨
風非卿多識前往極究本原安得有文如此玉堂得
人朕心則喜託疾引去未諭厥懷且官當久任此卿
前日之奏也今乃有請何自戾若是乎所請宜不允
故茲詔示想宜知悉

第三乞外劄子

臣輒冒萬死披露腹心控告君父臣以一介踈賤初乏
寸長蒙陛下非常之恩致身華要每惟用過其分未嘗

頃刻自安緣此心氣舊疾乘以大作近者懇祈外補蓋
非獲已伏蒙聖恩特降詔不允臣感激殊遇加意調理
冀獲痊愈少副任使而所服之藥多是涼劑數日以來
吐利俱作晝夜無度見今用醫生鄒燁吳敏修二人診
視雖霍亂少止而心脾痛楚全不入食支離倦乏其勢
決非一朝一夕所能安愈翰苑獨員決致妨廢職事重
速罪戾欲望聖慈念臣賦分涼薄受祿滿盈馴致災迕
將遂隕越特畀外祠或待闕小郡使之保全餘生他日
苟未填溝壑尚當粉骨碎身仰答鴻造疊犯天威罪在
不赦臣無任戰慄俟命之至取進止

七月一日午時當
時批出依已降詔

不允不得
再有陳請

第四乞在外宮觀劄子 九月二日

臣度輸肝胆上瀆宸嚴衷誠所迫不暇文飾伏念臣才
無寸長性復懦弱既不能趨事赴功期表見於斯世又
無宗論竑議可裨聖時之萬一獨蒙陛下長養成就屢
加拔擢浸極清華之選天地厚恩未知所以報塞乃自
今春以來心氣舊疾日增月益自度不能任職輒敢頻
數請外聖恩過厚訓諭至於四五雖眷待當世名臣其
禮不過如此臣是以貪戀榮寵尚爾遲回近見一二侍
從相繼遂請乃知臣前者陳辭不力未能仰動天聽妨

賢竊位為臯滋大今朝廷推行內外迭補之制如臣叨
塵最久引去不早其於進退之義已無可言兼以未更
民事見嬰疾恙不敢僥覬州郡欲望聖慈特賜矜憫授
臣一在外宮觀差遣非特使之少贖既往之愆亦昭示
聖主保全微臣終始無已之意他日自當摩頂放踵仰
答洪造臣無任激切屏營之至取進止
是日御筆批付
中書後省降詔

不允詔 中書舍人王希呂撰

勅某省所奏劄子乞授一在外宮觀差遣事具悉卿
秉心無競制行以和宗論宏議裨贊乎朝廷高文大

冊發揮乎王度自極清華之選愈嘉趣向之醇胡為
丐祠欲以去國且頻數請外非卿求退之不力而遲
回尚爾迺朕眷留之益隆當知君國相與之誠復在
出入迭補之外其祇予訓無費爾辭所請宜不允不
得再有陳請故茲詔示想宜知悉

奏謝劄子

臣迂愚踈賤蒙陛下拔之衆人之中置之侍從之列恩
重立山報微毫髮積此憂懼浸成心氣之疾適值舉行
更迭舊制乃敢冒昧籲天冀食祠祿不惟少逭滿盈之
責亦免招致人言仰累識擢豈謂陛下推天地父母之
仁矜憐無能保護弱植面加訓飭使安厥位旋頒溫詔
諭以勿復有請龐恩優禮皆非微臣之所當得雖使赴
湯蹈火捐軀委命未足仰報隆施况於尋常文字之職
安能自效於萬一敢不矢心自誓別圖稱塞謹此奏謝
伏乞睿照

辭免轉官劄子

翰林學士朝議大夫知制誥兼侍讀兼太子詹事兼修
國史臣周某朝議大夫試尚書吏部侍郎兼侍講兼同
修國史兼權吏部尚書臣程大昌朝散郎新授試中書
舍人兼太子左庶子兼侍講兼同修國史臣陳騏朝請

大夫權尚書吏部侍郎兼同修國史臣芮燁劄子奏臣等準尚書省劄子以車駕幸秘書省奉聖旨各轉一官者冒膺鴻渥伏積震惶臣等竊惟祖宗時三館秘閣近在端門之內乘輿既可數至故或設醴以待群臣政和五年初幸秘書外省紹興載新館閣始有增秩故事至於開湛露之燕犒雲漢之章光於舊聞則有所待臣等猥以駑鈍分職三館恭值陛下親屈帝尊下賚東壁屬饜聖德窺觀宸藻已極榮遇若復兼用今昔之異禮更進階序深恐不稼取禾或累總覈之政相與孰慮義當控免懼瀆天聽不敢各上奏牘伏望陛下愛惜爵秩專

待有功裁抑僥倖始於近列收還前詔俾臣等免貽誚於公議不勝大幸干犯威尊伏候誅戮取進止

九月二十三日

午時進御寶批周某程大昌並降詔不允陳騷芮燁並不允

不允詔

勅某省所奏劄子辭免各轉一官恩命事具悉朕仰法祖宗崇儒愛幸書林恭閱謨訓庶幾尊行用底承平之盛卿以高文奧學久儀法從參秉史筆稽之故實進階一等何以辭為載披遜牘深切嘉歎所請宜不允故茲詔示想宜知悉

乞宮觀劄子十一月

臣輒披誠悃上瀆睿聰臣以孤生蒙陛下簡擢致身侍
從嘗欲畢命馳驅期副任使而臣爰自蚤歲即苦心氣
不寧今年以來其疾益甚職在文字每懼曠鰥抵罪累
曾控告君父冀從外補伏蒙聖恩屢頒詔諭未賜俞允
臣自知無以稱塞日益憂惶外雖似乎無它而病實深
於內每遇撰述往往思慮移時僅能下筆蕪類不工衆
所共見而况陛下聖學天縱睿藻日新臣於此久玷代
言之任可謂不知量矣近因回答國書果致語意失當
仰勤宸筆改定臣之不職罪豈容誅緣事干遠人恐傳
聞或至失實未敢入奏待辜便合請對陳情僥倖善罷

適連值假故未有班次不免徑輸危迫之情祈動天聽
伏望聖慈矜臣才思殫竭自取悔尤念臣懇求閒散前
後非一稍寬刑誅特授一在外宮觀差遣使之歸伏田
廬尋訪醫藥他日倘遂痊平誓當再策駑鈍圖報天地
父母生成之德臣無任跼踖俟命之至取進止

十一月
日御

筆批降詔不允
不得再有陳請

不允詔 權直崔敦詩撰

勅某省所奏劄子乞一在外宮觀差遣事具悉卿清
規邁乎朝倫懿文經乎國體久在禁苑具聞嘉猷固
已發吾詔令溫淳安重踵乎訓誥之餘加以禮遇恩

寵在廷莫二而乃懇言歸幾於辭竭而意盡豈朕不敏未達好賢之誠將卿既明自全引退之節莫喻厥意三復憮然詔旨屢頒勉留毋執所請宜不久不得再有陳請故茲詔示想宜知悉

奏謝劄子

臣近者擬進金國回書辭意失當憂懼惶惑莫知所措輒敢上章待罪意謂獲譴死矣伏蒙皇帝陛下仁並天地恩踰父師特下詔函諭以不得再請恩禮隆異迥無其比驚魂遽定感涕自零臣伏思本朝真宗眷待學士楊億一時群臣皆莫能及億嘗於契丹回書中用鄰壤

二字不契聖意尋引唐制乞行解職厥後竟棄其官犇歸陽翟今臣視億之才無能為役而鹵莽謬戾罪實過之陛下既不加之罰反過之以禮在臣僥倖比億何多剖心殞元莫報鴻造竭誠盡節誓畢此生謹具劄子奏謝以聞伏乞睿照

辭免禮書兼翰林苑奏狀

右臣今月四日準尚書省劄子節文三省同奉聖旨周某可除禮部尚書兼翰林學士日下供職者自天有命無地措躬臣竊惟掌禮代言班高選遶國初陶穀雖嘗兼領然宗伯猶是階官未率屬也元祐中獨蘇軾文章

學問稱此兩職然亦先後迭居不聞並命自紹興至於
 乾道沈與求孫近胡交修揚椿汪應辰俱是六卿祇帶
 兼權學士有以見名器之重不輕畀付如此今臣至愚
 極陋無一可取積繇遭遇徧歷清華懷感恩之意而口
 不能宣堅報國之誠而力不能逮前此奏對每及祖宗
 時居內制者大率久任則臣拳拳之志粗亦可推茅緣
 宿恙侵凌未免僥求間散陛下海涵天覆已極隆寬乃
 復過有褒遷超視二品直兼翰苑度越前規寵厚而愈
 加位高而益進方聖主大開公路臨照百官何乃眷私
 小臣獨用其至此臣所以既懷滿盈之懼又慮仰玷聖

明瀝懇籲天殆不容已伏望睿慈鑒臣悃悞非敢禮辭
 特頒詔旨亟寢成命清資異數留待奇才庶安危衷迄
 荷保全之賜所有恩命臣未敢祇受伏候勅旨

御寶批降詔不允

不允詔

崔敦詩撰

勅某省所奏劄子辭免新除恩命事具悉朕惟五禮
 管乎群情八座高於邇列若乃中朝有大著作而無
 所折衷諸儒有異議論而未知適從維時太宗伯之
 官豈同常有司之事卿以道德名望之彥首言語侍
 從之聯百王憲度靡不該通一代典章俱成誦記庸
 副朕選誰逾汝宜茲超陟於新班復乃歸於舊直進

趨內禁敷雷風鼓舞之辭退踐中臺秉夙夜寅清之節宜祇寵遇毋執謙懷所辭宜不允

謝表

臣某言伏奉詔命除臣試禮部尚書兼翰林學士仍賜對衣金帶魚袋鞍轡馬者宗伯綴文昌之坐已高曳履之班翰林依華蓋之星尚玷演綸之直當聖主謹持於公器獨愚臣常愧於私人臣某中謝臣竊考自古英俊之才旋觀當今文學之士或抑厭草茅之下或陸沉州縣之中瞻城南尺五之天致身無路想玉階方寸之地通籍幾人况乎出入禁嚴周旋侍從論思獻納日邇清

光被衣服乘歲叨徽數向匪負一時之望安能符衆論之公如臣者學不足以知方才不足以應務家壁四立甘為窮陋之民君門九重敢起躋攀之念而自親逢聖作首奉詔除簡知特厚於諸臣獎擢徧更於華貫官益崇而效寡祿愈富而報微左降固宜右遷何有忽拜便蕃之命疊加優異之恩帥屬春官光貳卿之舊次擣文禁苑忝四命之新榮煥寶帶以章身飾綉鞞而華駿正使實兼數器尚虞稱塞之難矧伊初之寸長何意超踰之甚周章就列俯仰懷慙此蓋伏遇皇帝陛下道協舜華志恢禹迹明在上雖洞照於群情浩其天每包

涵於萬類寧稍捐於爵秩恐或棄於菲葑遂致凡才亦
塵顯仕臣敢不悉其思慮稱是寵褒號令文章期助漢
家之制討論潤色勉晞鄭國之賢苟道素餐豈酬洪造
臣無任

舉自代奏狀

右臣伏觀朝奉郎新通判邵州軍州兼管內勸農營田
事周因問學登甲科才猷著仕路嘗治兩邑備宣愛民
捍寇之勞久沉下僚涵養益富使居禮樂文章之任必
有可觀舉以代臣實允公議

東宮賀冬牋

氣隨卦應象初起於中孚月與日同曆並書於甲子萃
休符於聖旦鍾景况於儲明中賀恭惟皇太子殿下盛
德被躬至仁成性問安視膳欣圭景之踐長遠佞親賢
對陽剛之來復自天有相與國無疆其四逢小至於承
華何禪羽翼三祝大來於純嘏益顯暉光懇之誠拳
拳於是

淳熙六年

東宮賀正牋

象測璿衡載齊於七政書開寶典重紀於上元繫時令
之更端宜春宮之集祉中賀恭惟皇太子殿下生知仁

孝日就聰明內殿捧觴不必馳漢家之道中心愛物奚
須放趙國之鳩茂臨獻歲之期丕擁自天之祐某欣逢
首祚猥綴下僚淵冲玉裕之姿益新厥德栢葉椒花之
頌彌罄乃誠

謝御書劄子 十一月二十五日

臣適蒙聖恩召至選德殿面賜訓諭欲以御書光寵下
臣尋準中使李裕文傳示聖旨頌賜唐白居易七德舞
七德歌一軸龍蟠鳳翔眩駭凡目仰惟皇帝陛下睿文
英武同符太宗選用將相內修政事將欲定兩京致太
平故有感於居易之言形諸翰墨少見聖意抑臣何幸

乃祇拜此賜昔本朝太宗皇帝以宋玉大言賦賜蘇易
簡哲宗皇帝以白居易紫薇花詩賜蘇軾皆所以寵待
詞臣垂光簡冊今臣榮遇殆且過之謹當十襲珍藏傳
示子孫侈遭逢之盛其於報塞惟誓糜捐謹具手劄奏
謝伏乞睿照

謝賜新茶奏狀 二月

右臣今月三十日承中使李肅傳奉聖旨賜臣出格新
茶二十夸者進紫筍之茶及清明之宴自唐而後奉先
為先寧容蟻蝨之臣首拜雲天之渥想旗鎗於閩苑生
羽翼於丹丘翰林分成象之春事光前代常伯待頭綱

之賜寵過本朝恩重丘山感深肺腑臣無任榮懼之至
謹錄奏謝以聞謹奏

辭免日曆轉官奏狀

右臣準尚書吏部牒近修日曆至淳熙四年奏知篇秩
以已降聖旨臣曾預修纂係在內官合轉一官者臣聞
命若驚措身無所竊以舜受堯禪光華二典之中武承
文謨度越三王之上久罕聞於並世今親值於同時蓋
國家甚盛之規實儒學難逢之會而臣猥繇薄技久竊
殊知供奉螭坳預初載史臣之高選周旋麟省窺兩朝
曆日之宏綱逮茲荐履於禁嚴適遇再陳於篇秩故四

周於歲律而疊進於官榮夫何總覈之朝有此便蕃之
寵自猶知其過矣人豈謂之當然伏望陛下天造無私
日光必照念臣遭逢千一雖與衆同察臣僥倖再三則
惟已獨或遂寢出綸之命或量裁考績之年稍令私義
之安實賴公朝之賜所有恩命臣未敢祇受謹錄奏聞
伏候勅旨

丐外祠劄子

臣輒殫誠懇冒干淵聽伏念臣奮身寒苦始望不過州
縣一官豈圖天幸蒙被聖主非常之知出入清華十有
八載凡學士大夫夢想之所不及者臣既徧歷而又居

之矣雖復真才實能竊恐未易當此况於臣乎是故人
以為榮臣以為懼人以為寵臣以為慙戰於中不安
寢食自外視之步趨應接似若無它而心虛氣索昏忘
困憊日甚一日浸覺不能支吾乃自去春以來數有外
補之請陛下隆天厚地益載小臣屢頒詔諭如待勳舊
宗卿禁苑繼被優除求去得遷宜黜而陟豈惟自知踰
分公論益籍之矣然臣所以冒受而不復固辭者欲使
中外知陛下待遇臣子極其恩意雖臣不肖無用亦且
曲留之於前進擢之於後庶幾智能之士感激奮勵爭
效命於聖世此則臣區區體國之素志也今陛下恩意

已昭而臣在職又及半載再伸前請今也其時至於位
高祿厚福過灾生數口之家無日不事醫藥近復有瘍
孫之戚私計怵迫不敢一控陳於黼座之前抑臣聞
犬馬戀軒葵藿傾日臣忝為侍從豈忘斯義若非分量
盈溢哀病侵凌懼貽顛沛仰累洪造則輕去闕廷甘心
閒散夫豈近於人情伏望陛下日月至明照臣肝胆乾
坤宏度恕臣煩瀆檢會累奏除臣在外宮觀一次使之
少息憂惶安養神氣三二年間憑藉天恩或未淪於溝
壑尚當再策疲駑趨事赴功圖報聖德之萬一輕犯宸
嚴臣無任屏息俟罪之至取進止

五月二日奉御
筆批降詔不允

不允詔

勅某省所奏劄子乞檢會累奏除在外宮觀差遣事具悉卿冲規亮節聳榮中朝大冊高文追躡前古越自去歲荐祈外祠所為眷留亦已備盡何未淹於時日又遽上於封章詔下禁林群聽習聞於溫厚禮行世室諸儒質正於異同固嘗念之疇可去此宜安厥位毋哂予懷所請宜不允故茲詔示想宜知悉

再乞外祠劄子

臣昨日披露腹心乞在外宮觀差遣伏蒙陛下面賜訓獎未俞所請隨頒詔諭曲示眷留待遇之恩至深至厚

便當欽承威命勉共厥職仰副聖意緣臣心有未安義當再摠危懇伏念臣才氣卑弱智識昏愚徒緣遭逢超取顯美身兼數職寵極詞臣恩施重於立山報效微於毫髮論邦法則瘵官之罪甚大推物理則惡盈之害可虞是以憂懼積於中寢食廢於外髮鬢衰白心志凋零若不力求退閒必恐坐貽隕越慮之既熟方敢控陳况侍從之臣更迭出入聖朝令典無歲無之今臣名為引去之言實貪非分之寵閱時滋久觀聽謂何故欲及罪戾未深之時疾病可療之際少圖休息苟違誅夷伏望聖慈亮臣素願之無它念臣真情之可憫特頒睿旨許

奉外祠臣迫切於中辭不達意干犯疏宸臣無任惶懼
之至取進止

五月四日三省同奉聖旨依
已降詔不允不得再有陳請

奏謝劄子

臣近者迫於衰疾冒昧陳情冀就退閒少安孤迹伏蒙
陛下推天地生成之德擴父母愛憐之心未容歸卧於
漳濱尚使參華於魏闕顧慙小醜冒稱大恩臣已遵稟
聖訓於初六日祇赴朝參訖續容請對控陳感戴兢惶
之意謹先具劄子奏謝伏乞睿照

辭免東宮轉官奏狀

右臣伏覩四月二十四日勅下禮部皇太子講禮記終

篇官屬特轉一官者得非所宜以懼以恐臣聞古者教
世子必以禮樂禮所以修外樂所以修內然後恭敬溫
文之德備焉三王有道之長實本諸此陛下稽古垂訓
日命儒臣講戴經於東序以助成儲德可謂同符三代
矣而臣叨塵近列參侍承華慙無寸長可補三善逮逢
卒業彌愧橫恩且臣寄祿之階寢崇增秩之寵沓至豈
特僥倖頻數慮貽身灾亦惟賞或僭差殆將累國伏望
陛下推明主愛嘖笑之義念名器不假人之言毋刻贊
書留勸功效蓋以例而加者上之恩也因辭而輟者臣
之幸也授受兩得庶其在茲冒瀆宸聰臣無任戰汗之

至謹錄奏聞伏候勅旨

五月 日奉御
寶批降詔不允

不允詔

勅其省所奏辭免皇太子講禮記終篇官屬特轉行
 一官恩命事具悉朕惟元良根本之重固嘗博求名
 德之彥以輔翼於東宮卿稟資直方蹈道醇正朕所
 簡注俾位端尹而能敷繹古今講明法度開益德性
 日以高明朕甚嘉之昔元榮以儲君專精博學謂之
 國家福祐今經告訖篇例進官等亦惟國體所繫且
 以致朕心之喜尚何辭焉所辭宜不允故茲詔示想
 宜知悉

乞宮觀第一劄子

臣輒瀝肺肝投誠君父內循僭越如蹈淵谷伏念臣至
 愚極陋本州縣之凡材不自意蒙被聖知揚歷華近常
 欲策勵駑蹇少效萬一而才分所局勉彊不前惟有翫
 散之文是臣少習深欲以此圖報天地生成之德而用
 意心氣日損事多廢忘動成謬誤曉夕憂懼寢食
 為之不安今夏嘗披露懇款僥冀祠祿伏蒙陛下曲頒
 詔諭感極至於無言尋以宗祀涓休許臣駢乘竊惟久
 濶之盛典稀世之榮遇周南留滯太史所嗟臣實何人
 乃幸遭際是以遷延累月未敢申言今者庶事告成神

人懽懽若復貪戀榮寵久而不去誠恐舊疾沉痾有加
無瘳討論潤色緩急或至閣筆公言可畏邦法難逃是
時陛下雖欲保全亦將無及此臣所以不避鈇鉞冒昧
有今日之請伏望聖慈檢會累奏授臣一在外宮觀差
遣庶使方寸獲安宿恙稍愈則臣殺身圖報何敢後於
衆人陳情籲天恭俟威命臣無任戰汗之至取進止

不允詔

中書舍人鄭丙撰

勅某省所奏劄子乞檢會累奏授一在外宮觀差遣
事具悉朕惟儒術行而天下富有德進則朝廷尊卿
以淵源之學啟迪朕心黼黻之文光華國典又服禁

嚴之列實深注委之懷何為抗章累求去位况才具
優兼於數職春秋尚盛於中年以疾為辭誠所未論
其體至意勉為朕留所請宜不允故茲詔示想宜知
悉

乞宮觀第二劄子

臣昨日罄竭愚衷冒塵淵聽乞一宮觀差遣伏蒙陛下
訓諭再三未忍使之遽去且謂臣自試詞科已簡聖知
臣上迫天威中銜恩遇精誠雖至辭不寫心退朝跼蹐
恭俟報可豈謂鴻私優假溫詔復頒捧讀以還感極而
泣因竊伏思陛下所以於臣委曲盡眷留之意者以臣

進由科目粗習文藝欲令常周旋於翰墨間也臣亦知本朝故事內制學士多是十有餘年未嘗輕為去就自可優游侍從展盡底蘊極書生之榮願何至固守不移之愚以自納於不測之誅蓋由臣宿苦心氣年運而往日以加甚舊書廢忘無復新功臨文之際屬思艱苦辭皆牽強常恐緩急宣鎖不能成章玷辱國體無所逃罪是以仰恃殊知思欲自為之所又念聖時難遇餘生可惜及今少圖休息免至遂為廢人異日尚堪奏薄技於從官之內或捐軀命於矢石之間天不可欺臣何敢忘伏望聖慈俯加憐察特賜矜許意迫言繁荐瀆君父臣

無任戰栗俟罪之至取進止

御筆批依已降詔不允不得再有陳請

奏謝劄子

臣昨再具劄子乞在外宮觀差遣準尚書省劄子備奉聖旨依已降詔不允不得再有陳請伏念臣蟲豸才微餅罌器小用過其量每深滿溢之憂病乘其哀寢覺精神之耗輒籲天而伸懇方伏地以俟誅敢圖推博愛之仁未忍徇投閒之請游頌恩旨曲示眷留傾葵藿之心彌堅此日逐桑榆之暖猶待他時臣無任感激惶懼之至謹具劄子奏謝以聞伏乞睿照

繳還殿中監職事申狀

近準勅差充將來會慶聖節上壽殿中監職事緣某先
曾借官就都亭驛押宴竊慮至日人使在廷衣帶相妨
所有原差勅一道并封皮全繳連在前伏候指揮仍連
元勅一道并皮十月七日三省同奉聖旨依改差刑部
尚書謝廓然其繳到勅令尚書省毀抹

明堂禮成賀東宮劄子

某等恭觀聖上肇禋明堂精意昭格積雨驟霽迄於熙
成神人歡欣中外闔懌亦惟殿下顯相君父慈伸貳觴
之敬用能助輯休祉敷為慶澤天下幸甚

未即詣東宮劄子

某等伏慮連日行禮稍勤未敢趨詣宮庭謹先此稟叙

賀悃伏乞令照

會慶節賀劄

臣恭遇會慶聖慈緣被旨二十八日借官押宴都亭驛
不獲拜舞鴛鴦之行伏願皇帝陛下睿算萬年奉庭闈
之榮養綿區一統包唐虞之舊疆永俾生民常躋壽域
臣無任瞻天樂聖懽呼頌詠之至

辭免吏部尚書兼翰林學士承旨奏狀

右臣今月二日準尚書省劄子三省同奉聖旨除臣吏
部尚書兼翰林學士承旨日下供職者寵光下集感懼
中深竊以文部設官卿列三銓之首禁林分職命專一

老之承諒非望實之交孚安得恩榮之並授如臣者性
 資昏鈍問學荒蕪綿力薄材事業每居於人後高官厚
 祿選除常在於眾先分毫未答於殊知積累更多於幸
 會儀曹再至禮文獲預於討論翰苑重游典冊屢參於
 潤色已溢餅罌之量方隆天地之恩外朝高南省之班
 內直冠北扉之秩求間而劇既難強於精神宜退而遷
 亦懼招於議論思逴貪饕之誚寧干通慢之誅伏望皇
 帝陛下明君知臣慈父愛子察臣吏才素短詎應付之
 銓衡憐臣筆力已哀難復責之翰墨收還異數改畀實
 能庶幾毛玠之清可踰於魏毋使鄭綯之密獨見於唐

伏候勅旨
 仰竇四聰伏須萬坐死所有恩命臣未敢祇受謹錄奏聞

不允詔 崔敦詩撰

勅某省所奏辭免除吏部尚書兼翰林學士承旨恩
 命事具悉綜銓省之公衡道內庭之密命攷皇朝熙
 寧而上實為台路之官閱唐室元和以來專待禁林
 之老班高地近事重職清曾宗朝而並除乃曠代而
 罕見卿懿文追古亮節表時英：人物之宗憲：邦
 家之望久在近禁灼知俊心稔光大之德而尊榮朝
 廷藉端醇之度而領袖侍從優賜顯渥曼超常倫當

即欽承毋庸過遜所辭宜不允故茲詔示想宜知悉
再辭免兼翰林學士承旨奏狀

右臣近具奏辭免新命伏蒙聖慈降詔不允臣仰戴恩
遇已蒞事訖惟是詞禁兼榮至為優禮非臣么麼所能
稱塞方欲再伸懇悃乞賜寢免茲者恭覩內批付學士
院以天官事繁今後非特旨撰述其餘並免臣有以見
陛下眷待微臣曲盡恩意並陞兩職示寵播紳復蠲減
撰述寬其思慮刳心殞元何足仰報洪造然臣竊謂優
異之禮須待俊傑之人若以凡材而輒冒受眾將指議
自亦難安且祖宗時學士兼知開封或領三司使免撰

述者蓋是朝廷差委別領職任有妨赴院非推異數以
便其私也官制既行六曹尚書多除翰苑如蘇頌累朝
舊德自刑部尚書改授吏書始除承旨豈嘗疊組並進
仍免常程文字如臣今日之優異僥倖乎伏望陛下矜
臣惶恐不敢當之意許臣免兼承旨學士使得殫竭智
慮効力銓綜以圖報答不惟私義稍安亦於公論惟允
干冒宸嚴臣無任戰懼俟命之至謹錄奏聞伏候勅旨

不允詔

崔敦詩撰

勅某省所奏辭免兼翰林學士承旨事具悉朕閱唐
故事翰苑置承旨自鄭絪始凡大誥令大廢置乃俾

專受不責以翰墨之勞也本朝以學士又次一人為之秩高體重固不常置卿又在禁林多歷年所宜峻厥陟用休其勞况綜秉銓衡叙進群吏亦已詔卿免凡撰述惟特命始預略如唐制矣金門玉堂方倚君重其無辭焉所辭宜不允

第三辭免兼翰林學士承旨劄子

臣近再具奏辭免兼翰林學士承旨伏蒙聖慈特降詔不允恩私隆重踰於丘山便當祇體聖意何敢固辭飾避然臣竊念分直禁林實為高選服勤文字乃其常職若驟進又虛之位仍加優逸之禮恐雖宿儒舊德不敢

偃然當此臣是何人輒敢冒居縱陛下寵遇微臣在公論必不容恕而况經筵史觀東宮僚屬比之同列兼職已多伏望聖慈察其情不自安懼速顛沛特賜矜憫許免上件恩命臣誓竭犬馬之力圖報天造取進止十一月九日三省同奉聖旨依已降詔不允

謝表

臣某言伏奉詔命除臣試吏部尚書兼翰林學士承旨仍賜對衣金帶魚袋鞍馬者頻年入侍徧塵清近之班兩職並陞復冒殊尤之寵責服章於朽質被鞞策於名駒異渥鼎來危衷震惕臣某中謝臣聞漢以尚書為喉

舌唐以翰苑為腹心明光畫省之嚴夔龍接武浴殿金鑿之邃頗收在中凡預選掄已為要劇矧疊膺於印組足增耀於簪紳如臣者天分弗高人才甚下自惟始願不踰州縣之間誰意晚塗寔躡賢豪之上揆分數祈於罷免疏榮更誤於褒遷冠秩序於南宮進班聯於東閣胡瞻鶉特又慙受祿之無功兼取得熊魚彌愧舍生而取義二儀施大一介命輕此益伏遇皇帝陛下文武生知聖神廣運使人也噐隨良窳以無遺與物為春舉根莖而畢遂是容賤士仍玷點高門惟聖朝法令之具存初不勞於鑿裁而明主德功之俱懋亦何待於論思弟當守三尺以不欺且復盡一心而無隱庶持孤節仰報鴻私臣無任

舉自代奏狀

右臣伏觀宣教郎簽書鎮南軍節度判官廳公事孫逢辰才能之優可剗繁劇文學之敏宜備咨詢臣實不如舉以自代

歷官表奏卷第三 終

歷官表奏卷第四

周益文忠公集一百二十五

淳熙七年

東宮賀年牋

正合乎天謹歲年於周朔雷潛乎地推動靜於羲文在
時為亨於禮宜慶 中賀恭惟皇太子殿下徇齊以敏溫
敬而文日月就將方懋聰明之德國家閒暇莫窺監撫
之功當南極之景舒知少陽之道長榮奉兩宮之樂協
臻曼壽之祺某託備下僚會逢亞歲龍墀北拱欣仰睇
於淵冲鶴禁東開嗣虔修於班謁

同講筵官辭免進讀三朝寶訓終篇轉官奏狀

太中大夫試吏部尚書兼翰林學士承旨兼侍讀臣周
某朝請即試兵部尚書兼侍講臣王希呂朝議大夫權
尚書戶部侍郎兼侍講臣陳峴朝奉大夫侍御史兼侍
講臣黃治朝奉即秘書省著作即兼宗政殿說書臣崔
敦詩同狀奏臣等昨準尚書省劄子五月六日三省同
奉聖旨經筵進讀三朝寶訓終篇侍讀侍講說書並特
轉一官者非常之恩承命震恐臣等伏睹真宗咸平中
肇正講讀之職始命邢昺專講左氏春秋其後篇帙既
竟特宴近臣仍有賜賚遷官之寵載在史冊以為美談
仰惟陛下迪三聖之丕烈頻御迺英樂聞謨訓臣等適

有天幸偶值終篇聖恩所加務極隆厚賜飲則勅使踵
至賚予則駢蕃不一臣等無稽古之力竊稽古之榮其
為光輝已不勝言若復驟增顯秩必將上累信實下拂
公議此臣等之所以懼也且邢昺初終自講一經宜有
異數今略計十九年間任講讀者近六十人曾非獨勞
乃掠衆美此又臣等之所以懼也伏望聖慈矜憐危懇
原省罔功因其旅辭特格前詔庶幾僥冒之責猶逭於
萬一臣等無任虔祈戰汗之至謹錄奏聞伏候勅旨
五月十二日三省同奉聖旨並不允
內周某王希呂令學士院降詔

不允詔 王希呂全

勅某省所奏辭免經筵進讀三朝寶訓終篇特轉一
 官恩命事具悉朕聞恭祖舊所以迪順民之方擇儒
 人所以廣多聞之智誕惟三聖炳德六經思紹述於
 猷勳迺周爰於殫洽卿夙儀禁闈咸擅才謨進聯講
 幄之華備罄幾音之助甫終篇第宜有褒優夫推朕
 顯尊祖宗之心故凡今經綸訓典之彥趣加蠲賞式
 示至公非爽舊章毋稽成渙所辭宜不允

申省狀

右某等近蒙聖恩以進讀三朝寶訓終篇特轉一官尋
 具奏辭免未奉俞旨不勝震灼竊惟明主日御經幄咨

詢聖謨 文之勤中外嘆仰某等分日誦說豈嘗宣勞
 乃緣特恩躡進階秩遠攷咸平之制既已不同近觀紹
 興之時又無此例逢辰雖幸冒寵何名伏望朝廷特與
 敷奏許賜寢免庶安私義免累公朝某等實為厚幸謹
 具申尚書省伏候指揮

五月十五日三省同奉聖旨周
 某王希呂依已降詔陳峴黃治

崔敦詩依已降指揮並
 不允不得再有陳請

進謝恩詩表

少傅保寧軍節度使醴泉觀使兼侍讀衛國公食邑一
 萬一千五百戶食實封四千九百戶臣史浩太中大夫
 試吏部尚書兼翰林學士承旨兼侍讀兼太子詹事兼

修國史管城縣開國伯食邑八百戶臣周某某朝請即試
兵部尚書兼給事中兼修玉牒官兼侍講符離縣開國
男食邑三百戶賜紫金魚袋臣王希呂朝議大夫權尚
書戶部侍郎兼詳定一司勅令兼侍講閩縣開國男食
邑三百戶賜紫金魚袋臣陳峴朝請大夫起居郎兼太
子侍講臣木待問朝請郎守起居舍人兼玉牒所檢討
官臣宇文价朝奉大夫侍御史兼侍講臣黃治朝奉郎
秘書省著作郎兼學士院權直宗政殿說書臣崔敦詩
上表臣某等言伏蒙聖恩以進讀三朝寶訓終篇賜臣
等御筵及牙簡金帶硯匣鞍馬香茶者侍言虎觀陳三

聖之宏規錫宴麟臺講一時之盛禮匪頌意厚宣勸恩
深既怙冒於光榮宜發揚於歌詠臣浩等中謝臣等伏
以皇祖有訓嘉言孔彰開創守持垂億萬年之基業都
俞吁咈六十載之綱條皆聚此書克昌厥後而臣等
讀慙左史時際右文獲並造於細旃敢妄希於重席徒
緣幸會猥被眷私屬饜肴核之豐眩駭鼓鐘之奏裊蹠
象齒第分御府之珍駿足凋鞍均拜天開之賜載盼貢
煇申錫寶薰豈伊極陋之姿堪此殊常之寵茲益伏遇
皇帝陛下緝熙帝學闡繹人文誦上世之遺書寧專耳
受監先王之成憲固欲躬行逮訖華編特推飲賜儒流

月益公集 歷官表卷四 四
改觀識咸平慶曆之遺風政路偕來兼元祐紹興之故
實若時曠典增煥昌期臣等積愧優恩粗知美報蓋九
五正大君之吉象已應於雲需則群黎祈萬壽之增詩
必賡於天保臣等無任感天荷聖激切屏營之至謹各
齋沐撰成謝恩詩隨表上進以聞

同侍從慰皇子魏王薨奏

臣等恭承皇子薨背仰惟聖情良切悲悼伏乞以理寬
釋俯慰群心臣等無任虔懇之至

乞宮祠劄子

臣輒控愚誠仰干洪造伏念臣再塵禁路六閱歲華課

績用以蔑如冒遷陞而寵甚邦彝具在久踰更迭之時
物理可推寢昧滿盈之戒昨繇宗伯改領選曹獻納論
思曾微片善簿書期會初乏寸長仰負眷知俯慙譏誚
又遷延於半載乃冒昧而一言正惟固戀於恩榮是以
弗輕於去就茲緣疾恙驟覺衰疲內無可展之才猷外
則弗強於筋力省循頑頓合致人言恃賴隆寬尚容自
列伏望陛下軫念軒墀之舊擴施天地之仁許奉外祠
俾逃大戾性如麋鹿期少遂於山林效若犬鷄終再伸
於鳴吠臣無任祈天俟命惶懼激切之至取進止

不允詔 學士院權直趙彥中撰

勅某省所奏劄子乞奉外祠事具悉朕惟儒者之在
朝有若大山之蘊玉雖沉潛美不見外然光潤及物
者多卿履德清純受才淵茂敷言華乎邦國端誠儀
於朝廷嘉惟節業之修蔚為侍從之倡粵升銓綜之
冠具有忠勞之宣事經畢陳官序惟穆屬小愆於衛
養旋既遂於寧瘳胡輕抗言謀欲自佚况比進金華
之讀正以便細旃之咨迺鴻碩之弗留豈僉輿之歸
允勉安厥服毋哂至懷所請宜不允故茲詔示想宜
知悉

再乞宮祠劄子

臣昨日於經筵留身以疾病之餘不勝疲憊乞奉外祠
蒙陛下天語粹溫曲形慰勞且謂寶訓終篇一時盛典
卿豈不體朕眷禮之意臣惶懼感激莫知所措尋具奏
陛下用臣太過遂致滿溢挺災劇曹要官非養疴之所
清資駢組積妨賢之愧知進不知退有害盈之悔若復
貪冒榮祿必將重速顛危伏緣駕坐已久臣之悃誠未
容殫竭退而屏息俟命不謂俞音尚闕詔旨隨頒恭惟
隆天厚地之恩何以稱塞自合仰承眷遇豈敢固守不
移之愚其如實迫病衰勢有不能但已伏念臣踈庸懦
弱略無寸長一自移置銓曹寵任彌劇朝思夕慮每不

皇安詘指計日只俟俯近甫半歲即上章丐去臣之素志同列具知已定此月十二日乞對矣會瘡腫在告旬浹私念忝陪近侍安可以疾卧家徑入文字故就二十三日勉強祇赴朝參尋曾奏知只候有班次便伸懇款以此見臣犬馬戀軒反覆籌度非驟為是堅請也天日在上一言敢欺伏望聖慈俯賜矜察特從所請臣投閒之後若遂忘報國則何以自立於覆載之間劄心殞元期在御筆批它日疊犯天威臣無任戰慄祈懇之至取進止依已降詔不允不得再有陳請

奏謝劄子

臣比緣瘡腫頓覺衰羸兼恐從駕過宮乘騎未得是敢願天有請願遂投閒恭值皇帝陛下日御金華憲章寶訓念臣昔叨侍立於開講之始今忝進讀於終篇之時疊詔音未許其去恩私加厚糜隕難酬臣謹當遵稟聖訓直俟榮觀盛禮之後別伸丹悃謹先具劄子奏謝伏乞睿照

辭免參知政事劄子

臣今月十七日準尚書省劄子奉聖旨除臣參知政事特降中使宣押赴都堂治事者成命初傳衆聽俱駭微臣自度兢懼可知仰惟皇帝陛下宵旰圖治規恢大業

謂凡立政造事折衝消萌無非以人才為本故雖有列於朝聖心固不遴選而况附股肱以承元首禪棟梁以安大厦號為執政非他官比選用之際豈容或輕伏念臣以章句腐儒叨塵侍從受恩踰於山岳圖報微於絲毫揣分量能方祈罷免敢圖殊擢躡政機是使瓶罌之器汲萬斛之泉疲駕之馬負千鈞之重其滿溢顛覆可立而待也伏望聖慈察臣么麼不可大受亮臣悃悞非曰小廉別求真材庶允公議且國朝進用二府固有論定而亟改制出而復收蓋以選衆為重而反汗為輕也冒輸危懇必冀矜從臣無任懇祈激切俟命之至取

進止

不允詔

崔敦詩撰

勅某省所奏劄子辭免參知政事恩命事具悉蓋聞至治之世俊乂在上下及虎賁趨馬左右攜僕罔不惟正之擇濟濟之風民視以化而况二三執政之臣圖翊大務考審所與其可以輕朕懋師古道以卿智噐雅厚機神穆遠沉潛經德之粹鮮明固守之節揚歷二禁藹然日章肆庸應嘉爰究爰度宜績之事登陪政塗朕之用卿迹觀已素卿其思報奮勵所為毋事搆文而留允令所辭宜不允

辭免參知政事表

臣某言伏蒙聖慈以臣辭免初除參知政事恩命特降
詔書不允者疑丞任重方陳控避之言神聖恩隆遽下
往諧之詔揣分知逾於始望輸誠敢緩於終辭臣某
謝伏念臣猥以孤生際於興運久趨龍尾親依日月之
光盡上黿頭畏懼雲霄之逼顧才力何裨於當宁乃眷
知特異於在廷駭進用之非常殆周章而失措蓋禁路
論思之責尚惕若以難安矧政塗密勿之機敢偃然而
參預伏望皇帝陛下知人堯哲徧物舜仁念愚臣之靜
言或違於用思治世之先務莫急於賢別求四近於具

瞻毋為一夫而輕假臣若得姑仍舊貫弗玷新榮則當
精思竭慮於翰墨之場履正奉公於銓衡之地庶酬洪
造抑遂素心臣無任祈天俟命激切屏營之至謹奉表
陳免以聞

批答

崔敦詩撰

省表具之朝廷延登常取群望廊廟重任宜聳具瞻
揚綰用而宿貴改觀王陽進而善士生喜朕選建碩
輔翼宣大猷國皆曰賢政將焉避卿初終有守本末
無疵以其績密而粟可以參訐謨以其中正而通可
以經丕務俾釋銓管遂躋柄途人之信道固將有行

國之用儒時 維允猷為滋始遠近所觀方朕衷委
重之意深亦衆志望賢之責備勉摠素蘊汜濟熙圖
謙避之章止毋來上所辭宜不允仍斷來章

批答口宣

朕選求人望參翊政幾當成命之方行已僉言之維
允亟恢賢業遂畧謙章

謝參知政事表

臣某言伏奉告命除臣參知政事尋具辭免伏蒙聖慈
特降中使賜臣不允批答仍斷來章者論思無補盍退
屏於立園圖任有加俄進陪於廊廟牢辭弗獲冒處為

慙臣某

中謝

臣竊觀歷代人材之興全繫時君心術之

致未有蛟龍翔而雲霧不應未有元首明而股肱弗良

事漢宗臣皆秦室無聞之吏興唐碩輔率隨朝未遇之

人上既有任賢使能之方下固多奉令承教之佐患弗

求耳夫何遠而矧堯舜之相傳宜夔龍之接武豈無俊

傑可助弼諧如臣者器識卑凡藝能譎薄幸遭逢於初

政蚤塵汚於近班陛下非不作成而臣無可教之質陛

下非不策勵而臣有弗移之愚然猶處之詞禁之高華

試以文昌之繁劇每示眷留之寵屢形進用之言益覆

燾之中舉無棄物而照臨之內悉耀末光是容一介之

臣亦綴三卿之後腹心所寄頂踵奚酬慈蓋伏遇皇帝
陛下聖哲生知德功日起五帝其臣莫及方獨運於宏
模四方宣力汝為抑旁資於協濟既將博採寧免兼收
顧慙極陋之姿恐負延登之意臣敢不勉殫力思稱所
蒙禹臯益稷之三謨難窺大訓韓范富歐之四傑或企
前修臣無任

謝太上皇帝表

臣某言伏奉告命授臣參知政事者朝有四隣實聞國
論臣無一善虛冒恩除揣愚分以非宜愧師言之弗稱
臣某中謝伏念臣奮身下土竊第丁年自入仕於王畿

即受知於聖鑒鑿坡召試金口褒揚許以能文欲其掌
制之援助廟堂之上甘滯留館閣之中會臺察之闕員
簡宸衷而親擢俄逢堯禪獲際舜華滋蒙特達之知徧
歷禁嚴之地方虞幽黜迺誤明揚越繇侍從之聯躡造
疑丞之列雖貪生之類夙仰戴於陶成然太極之功終
莫窺於運用茲蓋伏遇光堯壽聖憲天體道性仁誠德
經文緯武太上皇帝陛下仁參列聖道媿三皇稟德謙
冲治定功成而弗有怡神閒燕天長地久以無疆俯眷
孤蹤密恢洪造臣謹當靖共厥位精白乃心思重丘山
曷效兩宮之報誠堅金石第祈萬壽之延臣無任

謝東宮牋

某言先準誥命除參知政事已於今月五日朝謝訖者
 青宮元職久進侍於淵冲黃闥聯班忽冒膺於宸渥用
 踰分量愧極心顏某中謝伏念某學不足以知方才不
 足以應務平生艱拙已絕望於功名中歲遭逢乃參華
 於侍從眷言啓省之任時謂政塗之階猥以庸 濫茲
 承攝夏絃春誦殆拭目於六年日就月將常傾心於三
 善顧待遇獨加於流輩知荐揚時達於睿聰是使迂儒
 亦聞大政材如社木疇可助於棟隆味若野芹顧何裨
 於鼎寶凌兢拜命俯偃懷慙茲益伏遇皇太子殿下恭

敬温文聰明淵懿進而侍膳懋忠孝之宏規居則談經
 洞古今之要禮每攷：於善士尤眷：於下僚逮此超
 踰若為稱塞某敢不悉其志慮濟以端良羽翼自成昔
 固慙於園綺股肱汝作今尚勉於夔龍謹奉牋陳謝以
 聞

辭免正謝賜衣帶鞍馬劄子

臣蒙恩除參知政事今月五日正謝又蒙聖恩賜臣對
 衣金帶魚袋鞍馬竊惟賜服所以旌有德錫馬所以待
 有功而臣供職之初已經宣賜謝恩之日復冒匪頒豈
 容兩旬而忝再命禮雖從厚心實懷慙伏望陛下察臣

僥倖已多念臣滿盈是懼可以無與使之少安特降指
揮追還所賜臣無任惶懼俟命之至取進止

辭免兼勅局劄子

臣準尚書省劄子以參知政事錢良臣辭免兼職三省
同奉聖旨差臣同提舉勅令所者臣承詔惕息固知所
措竊惟執政之兼書局初無定例同升或容分領未至
奚必曲成今者良臣陳義甚高過於謙遜臣若汗顏代
斷獨不愧晉人其下皆遜之語乎况臣鄙朴無能超踰
已甚律設大法懵然弗知將何以助陛下三章之約贊
相臣畫一之謀今蚤已嘗面奏天聽未回須至再有陳

免伏望聖慈矜臣惶恐不自安之意特降睿旨俯從所
請許仍其舊臣無任懇迫俟命之至取進止

御筆批降
詔不允

不允詔

勅某云：事具悉朕觀國朝循唐舊制凡刪定律令
必以廊廟之臣領之示不敢輕也卿以經術潤皇猷
以智畧斷國論宜以餘力訂吾冊書况今倚任大臣
總正諸事宏章鉅典各奏厥成卿獨袖手於其傍可
乎所辭宜不允

生日詔

勅某金行澄爽玉管流商氣鍾河嶽之英時作邦家

之輔爰推賜式俾介壽祺今賜卿生日羊酒米麩具
如別錄至可領也故茲詔示想宜知悉

羊二十口法酒一十餅法糯酒一十餅糯酒一十
餅杭米一十五碩麩一十五碩

謝表

臣某言伏奉詔書以臣生日特降中使賜臣羊酒米麩
者位聯丞轄方豫享於堂封戶紀桑蓬更鼎來於臺饋
恩私厚甚報效茫然臣某 中謝恭惟明盛之朝眷是贊
襄之列記其生育被以寵光詔隨勅使以及門賜出天
庖而克宇惟才堪大任斯不負於養賢惟家有嚴君乃

或伸於養志臣於二者舉無一焉尸素積年每愧河檀
之刺羈孤多難久纏風木之悲敢圖賚予之榮加資劬
勞之日茲蓋伏遇皇帝陛下惠綏庶品優遇適臣既醉
太平俾興君子之行為羹饗士固異賤官之常所慙驚
鈍之姿莫稱籛牽之禮千鍾弗泊思親養以無從一飯
必酬况君恩之至重毫分可報糜隕奚辭臣無任

旱災待罪劄子

臣竊見邇來諸路多以旱告陛下焦心勞思苟可格天
裕民無所不用其至而時雨未降歲事可虞豫政之臣
自當均任其咎按慶曆春旱治平水災參知政事宋庠

丁度趙鼎歐陽修或特從貶降或上章自劾民言可畏
故事甚明臣適於榻前已曾奏知今更不敢入局治事
見遷出僧舍待罪伏望聖慈顯行黜免改用賢雋以召
和氣取進止

不允詔

崔敦詩撰

勅某云：具悉朕惟治有大虧斯上千陰陽之變君
為元首豈咎專股肱之臣迺者慘氣浸蕃時澤弗效
場功莫戒民氣固孚永言致盥之繇方切在予之責
卿屬參政事之選宜共圖銷復之原奚為抗章援故
去位夫祖宗之制施置之宜慶曆雖略循漢氏之前
曩治平固無取永平之推咎勉思報國之誼副朕克
躬之誠所請宜不允

乞罷黜表

臣某言伏蒙聖慈以臣引愆待罪特降中使宣押臣隨
班起居奏事畢赴都堂治事仍降詔書不允者伏以上
帝垂恩每篤農夫之慶下臣失職致興旱魃之災雖眷
憐未置於嚴科在譴罰具存於故實臣某中謝伏念臣
本繇薄技誤結殊知曾微一善之可稱夫豈四鄰之敢
望冒膺擢任常切憂虞永惟上聖之厲精穆卜群賢而
佐理旋觀近歲浸底泰和無愆伏之陰陽有豐登之稼

穡祗自夏秋之際頓貽宵旰之勞雲屢密而復開膏每
屯而未溥職臣驟進召此旱祥雖日淺位卑敢遽干於
大戾然天時人事似深譴於微臣願以身當庶其衆允
伏望皇帝陛下仰稽天意俯察民情毋嫌大用於前而
廢小懲於後致和消沴必為三日之霖進善黜幽允協
萬邦之望臣無任祈天俟命激切屏營之至謹奉表陳
請以聞

再乞罷黜劄子

臣昨以雨不時若嘗具奏乞行黜責伏蒙聖恩特降中
使宣押隨班奏事臣惶懼感激莫知所措竊伏惟念才

薄德輻驟膺晉擢既於人望有所弗協則夫設施議論
見於協贊者必多謬盭以上干陰陽之和昔東海太守
斷獄失平猶成旱歲况臣聯班二府豫聞機政積其瘵
曠致沴可知不在乎位序之崇卑任事之久近也伏望
聖慈察臣不敢自恕矜臣無所逃刑早降處分特從罷
斥干犯威尊伏地震栗取進止

御筆

卿等荐陳章奏欲乞罷政事具悉君臣同德以格天
心可也而陰陽不和專咎輔弼此漢之制朕所不取
今偶亢旱時雨未降正宜講明闕政以召和氣乃遽

求去豈朕所望哉當安厥職所請宜不允

東宮賀冬牋

魯觀占雲知豐年之習吉周圭測景驗化日之彌舒百
順備於皇家多祥叢於儲極中賀恭惟皇太子殿下凝
姿聰哲毓德溫文東學時修嗜詩書之至樂重親日侍
邁忠孝之永圖茂臨亞歲之辰均衍萬齡之慶某久陪
鶴禁密跂龍門家國安榮喜冠古今之治陰陽消長諒
同天地之心欣頌居多替揚徒費

歷官表奏卷第四 終

歷官表奏卷第五

周益文忠公集一百二十六

淳熙八年

東宮賀年牋

周重端辰誕布始和之吉漢尊獻歲具嚴元會之儀繫
我儲明受茲帝祉中賀恭惟皇太子殿下重光映日前
曜拱辰玉佩朝春稽首未央之殿斑輪扈蹕稱觴德壽
之宮惟慶賀之交修殆古今之鮮儷自協天人之祐永
同家國之休某叨預政機夙蒙恩遇府開天策常夢想
於英游苑立思賢尚阻陪於班謁其為頌詠曷罄敷陳
辭免劄子

臣準尚書省劄子四朝史志成書以臣經修奉聖旨特
轉一官者非常之恩承命惴恐臣竊以翰墨策勳固書
生之榮願必當其功乃或無愧而臣積緣幸會蚤被獎
擢二十年間四叨史職含毫閣筆翫愒歲時曾不能鋪
張列聖之德業參定信書之凡例移官累月方上奏篇
向非閨臺英彥悉心論纂則汗青之日未可期也臣得
免疇昔瘵曠之戾為幸已多而何賞慶之敢望豈謂皇
帝陛下覆燾之仁有生者溥及雨露之澤近天者先濡
特令增秩以示眷寵雖功疑惟重賞寧過借乃聖主厚
下之意然因人成事無功受祿概之古誼臣何敢安已

嘗面控忱詞茲用荐陳危懇伏望睿慈俯賜矜察明詔
攸司收還誤寵免至再三之瀆重干淵聽臣無任感激
惶懼俟命之至取進止

不允詔

勅某省所奏劄子辭免以四朝史志成書曾經修特
轉一官恩命事具悉朕緬惟神祖適駿先猷惟時史
臣咸極妙選然方修而曾鞏遽釋其任既成而蘇頌
弗預於恩乃知名儒宗工宣勞載筆任而久：而成
茲亦古昔之所難也卿高文大冊博識洽聞追迹二
臣固已有光向者四入承明咸典斯事網羅囊括用

力最多今釋簡冊登廟堂曾不淹久成書來上不其
榮乎答翰墨之成勞侈儒術之亨遇一階例進予猶
歎然遜避之章所毋庸至所辭宜不允

再辭表

臣某言伏蒙聖慈以臣辭免經修四朝史志轉一官恩
命特降詔書不允者奏牘上聞汗青之無補詔函中
錫愧情素之未伸敢憚牢辭冀回誤賞臣某
中謝竊以
參聯近弼特異庶工職在彌縫既無日成月要之可考
恩隆體貌又豈年除歲遷之是圖間因典策之修或陟
階勲之峻蓋疇久次且表殊知如臣者豫非才閱時

尚淺論新功則未效紀舊績則尤踈雖嘗執簡以搖毫
其實濫巾而竊吹馬融三入東觀謾誇漢代之至榮知
幾屢為史臣莫就唐朝之大典值成書之進御沿故事
以申恩反覆思之叨踰甚矣伏望皇帝陛下舜明察物
湯懋功諒臣品秩浸高難復假名噐之寵念臣官曹
既易豈應分鉛槧之勤濬發俞音趣收前令使朝廷之
上無貪榮僥倖之譏則海寓之間有識分興廉之俗庶
共扶於公道寧專遂於私心臣無任祈天俟命激切屏
營之至謹奉表陳免以聞

批答

省表具之朕監於往昔咸重史臣觀厥成功率惟久
任張華尚誇於再至蔣乂嘗越於十年當時推榮後
世稱美卿懿文華國雅望表民自窺典籍之藏逮聽
星辰之履咸專載筆遂究長才力倍群英功先衆作
爰優班於恩典奚固執於謙規俾下多興廉識分之
風雖可嘉於卿志將國有吝賞廢勞之舉亦殊失於
予心當即欽承毋庸重請所辭宜不允仍斷來章

謝轉官表

臣某言伏奉告命特轉一官加食邑實封尋具辭免伏
蒙聖慈特降中使賜臣不允批荅仍斷來章者述四朝

之史志夙愧瘵官升三品之文階今慙誤寵祇若絲綸
之下凜如淵谷之臨臣某 中謝 臣伏以爵秩之遷朝家
所重或赴功趨事內殫夙夜之勤或禦侮折衝外竭封
疆之力於烏錫命斯謂陟明豈容尸素之人越晉高華
之序如臣者奮繇詞藝久綴班聯既微汗馬之勞又匪
屠龍之筆承明三入忝冒為多甘茂十官貪饗已甚逮
茲拜賜殊以覲顏此蓋伏遇皇帝陛下天覆群臣日新
庶政功疑則厚弗矜虞舜之聰明賞信為先兼總漢宣
之名實寧使匹夫之僥倖不令一善之遺忘臣於斯時
遂玷殊渥官崇祿厚未知稱塞之方恩重命輕惟誓捐

縻之報臣無任

謝太上皇帝表

臣某言伏奉告命以臣經修四朝史志特轉一官者克位疑丞未宣迺力策勳翰墨又進厥官懇避無從叨踰有覲臣某 中謝 臣伏以六十載貽謀之志億萬年傳信之書屢易星霜甫成卷帙而臣昨在紹興之際嘗蒙上聖之知以書林是正之官兼史氏編摩之職逮今二紀被遇兩朝幸嘗秉筆以周旋敢覲終篇而尊奉晚陪機政獲預榮觀賴儒先筆削之功在賞慶褒崇之數維茲忝竊良以震驚此蓋伏遇光克壽聖憲天體道性仁誠

德經武緯文太上皇帝陛下盛德備躬至仁及物道包衆 雖蕩 以無偏天覆群倫每恢 而不失 凡在含生之類孰非受賜之人顧方高蹈於希夷何以仰酬於造化臣敢不勉殫忠盡圖稱恩榮居慙班范之才何裨潤色幸際勳華之主請祝壽祺臣無任

謝東宮牋

某言伏奉告命以其經修四朝史志特轉一官者政塗竊位何補於大猷史局奏篇誤升於宗秩凌兢拜命俯仰包羞某 中謝 惟四朝仁聖之相承有五紀設施之可考禮樂政刑之畢舉堪輿夷夏之兼該分職設官在更

張而不一整軍經武於制度以尤詳必能發揮既往之規模乃可昭示方來之準則况資鴻筆庸訖鉅編既閱歲以滋深宜成書之來上而其曩繇推擇嘗預討論正觀修書愧德榮之為首知幾司 慙唐史之未成逮錫賞於公朝例叨榮於寵數茲蓋伏遇皇太子殿下學探聖域性廣仁端入奉慈顏方問安於有永出臨講肆每進德於無疆俯念孤蹤久陪末屬借以庇存之賜致茲優渥之恩青地深嚴雖阻瞻於暉潤丹心激烈尚圖報於知憐謹奉牋陳謝以聞

同趙相以下以霖雨待罪劄子

臣等仰惟陛下仁民愛物動合天心宜獲休證以符聖治乃連月以來罕遇晴霽致傷蠶麥今復霖雨過多秧種將損是皆臣等調燮無術有干和氣苟或自恕人言謂何伏見仁宗朝慶曆春旱宰相陳執中參知政事宋庠丁度各降一官臣等恐勤宣押不敢家居待罪欲望聖慈稽用故事將臣等先賜貶秩然後罷黜庶幾天意回而咎證銷少寬宵旰之慮臣等無任惶懼俟命之至取進止

不允詔


勅某省所奏劄子以霖雨過多乞先賜貶秩事具悉

屬者沴雨過常煩氣弗效惟政教之多闕致陰陽之
干和所賴適臣交修庶治遽形咎謝未體朕心勉燮
序之令圖導善祥於不日副予厚望茂迺懿猷所乞
宜不允

再乞罷黜劄子

臣等昨以積雨未霽害於麥禾輒援本朝故事乞先賜
貶秩然後罷黜伏蒙聖慈矜存備至詔諭恩勤臣等荷
戴隆私恨未有捐軀之路可報萬一惟是賞罰二柄理
難偏廢臣等誤叨簡擢服在近司平居則安享異數間
遇典禮又皆首被慶賞今者輔政無狀陰陽不調聖心

焦勞民庶咨怨瘵官之責將以諉誰容其自劾已足寬
典罰又弗加失刑甚矣何以弭災沴何以塞人言何以
勵庶工何以安厥位此臣等所以連章瀝懇不敢憚煩
瀆而遂已也伏望陛下赫然剛斷賜以黜幽既舉合於
大公自感召於和氣應天之實莫大於斯干犯威尊臣
無任激切俟命之至取進止



旋華要越二十年昨繇翰苑荐歷八座深惟踰分屢
丐退間陛下眷留再三德意隆厚未知稱塞弭劇兢危
旋冒選除進陪二府恩私之重何啻丘山所願殫竭疲
駑少效萬一而才分所局鞭策不前邦國大猷固非所
任簿書細故亦復何裨晝度夜思憂慙罔措徒以叨聯
四近稍繫觀瞻處之間不容率爾素餐尸祿遂踰二
年竊位妨賢罪則多矣加以年衰氣索百病交攻頭目
眩昏腰足酸楚半月前又因飲冷暴下一伏時方止緣
此愈覺疲憊不能支吾福過災生理想如此當陛下厲
精之日豈臣子懷安之時其如疾恙侵凌於心實不遑

處躊躇累日冒昧以言伏望聖度優容皇明委照念其
 奉侍之最久矜其膂力之驟愆許解政機俾歸田里重
 任既釋憂心自寬庶以餘生永陶聖化捐軀徇國期在
 異時冒瀆威尊臣無任云云

奉御寶批
降詔不允

不允詔

勅某云：具悉廊廟近臣朕所與朝夕圖回以儀天
 下之政者也其可以歲月久近議進退哉卿涵德淵
 虛蹈道時敏登朝應務細鉅必為宣翼之勤克厭朕
 志底書求去覽觀慊然古者大臣皆務其方以敦其
 節則群臣莫敢不正身修行以稱大體朕所嘉賴人

具爾瞻往定厥常益顯無窮之聞所請宜不允

乞罷政表 二十七日

臣某言伏蒙聖慈以臣乞解罷機政特降詔書不允者
 晋叨三接久冒處於高華退止一辭合並投於閒散恭
 承溫詔尚闕俞音感已極於肺肝情荐殫於悃悞臣某
 中謝伏念臣奮繇孤遠親際聖明以鉛槧腐儒而居侍
 從之聯以斗筭小器而備疑丞之列心固知其冒昧人
 共指其僥踰矧睿德之日新舉臣工而風動凡服采班
 行之內競赴事功豈參華廊廟之間乃令尸素頻年惴
 惴竊位容：上負九重之知下貽多士之誚積茲愧靦

成此病衰晝眩瞶以廢飧夜怔忡而忘寢足弱弗良於趨走腰頑殆困於屈伸雖欲強顏若為陳力用仰干於旒宸祈退返於田閭而天語鼎來篤眷留之意王人狎至體貌之恩夫何極陋之姿有此殊常之寵苟能加勉安敢執迷顧念所居之官誠非自恕之地若坐滿西曹之謫恐難逃東市之誅今雖似為於身謀實亦稍存於國體伏望皇帝陛下廣乾坤之量推父母之慈念臣遭遇於初元許臣保全其晚節及公言之未至諒素志之無它聽解政機俾安愚分循名責實已慚無補於聖時觀過知仁猶冀不妨於賢路輸誠深切從欲是期臣

無任

不允詔

勅某云：具悉卿精誠造微懿文合雅久服淵雲之侍從進揚魏邴之謀謨正資儒者之在朝難託謙文而避位其承素倚宜弭來封所請宜不允不得再有

陳請

乞通進司收接文字奏

右臣近緣陳解罷機政蒙聖恩指揮通進司不得收接文字今來仰體聖意已供職訖合有謝札緣未奉聖旨有司未敢通進欲望聖慈特賜處分便令進入謹錄奏

聞伏候勅旨

賜生日詔書

勅某秋物賜澄煒陰躔對望惟鈞途之俊哲降神嶽之粹靈特腆牢頌俾延家祉今賜卿云：

謝表

臣某言伏奉詔書以臣生日特降中使賜臣羊酒米麩者獻名州史永慨餘生拜賜家庭增光末路屬饜雖幸浮食知慙臣某中謝伏念臣拔起窮閭過尸榮祿糟醅是醉敢妄意於天漿藜苒充腸猥參和於鼎餼矧年饑用不足之際豈食飽居求安之時乃因載育之辰更冒

分甘之寵伏遇皇帝陛下仁均覆燾恩厚臣鄰每因儀物以示誠豈為庸罵而廢禮申以光華之使賁之温厚之言式示隆私寧專故實貪於飲食懼饕餮之干誅俾爾壽臧愧哉炮之均福誓殫忠盡圖報眷憐臣無任

乞序位李彥穎下劄子七月

臣嘗考國朝故事侍從而上或遇舊人再入其序位多在見任人之上非獨朝廷之體亦以興廉遜之風伏見參知政事李彥穎數年前已位二府今者再入臣合在下理無可疑伏望睿慈特降處分以憑遵守今取進止

第二劄子八月

臣適具奏乞序位李彥穎之下緣欲降付三省未敢盡述底蘊伏見熙寧二年文彥博以舊相為樞密使陳升之初拜宰司神宗用天聖故事特令升之仍位彥博之下雖王安石力阻彥博收回成命然詔書具在聖意高遠非安石所能知也夫宰相樞密使位序有差國朝尚且迭為先後况同是參貳班列一等謂如元豐以後同知樞密院尚書左右丞或互有除改則位次不易其來久矣臣之末至自應在彥穎先進之下尚復何疑至於侍從之類其例尤多慶曆五年楊察再知制誥同僚張方平等上言察係再入請班居上有旨從之紹興以來

猶有用此例者若是偶未思索或不暇檢閱典故猶可襲常蹈故臣既心知其然倘不自列則欺罔之罪大矣臣竊恐來日立班相妨本欲權免朝參一日又慮外議不知此意妄有傳說遂復不敢欲望聖慈宣諭閤門許臣班彥穎之下庶幾於義稍安臣素蒙陛下恩憐乃敢殫竭悃幅伏取進止

辭免知樞密院事劄子八月

臣伏蒙聖慈除臣知樞密院事特降中使宣押赴院治事者臣聞命震惶罔知所措臣竊以西樞分職兵柄在焉本朝雖委用儒臣亦須有文武才略識華戎事體且

望實素為中外所信服者然後舉而用之乃能仰副注
倚俯協公議如臣不肖論迂而性拙徒以章句之學久
被簡知服在論思已為忝冒驟參機政彌愧超踰敢意
誤恩進籌帷雖陛下聖謨獨運神武布昭執事之臣
不過稟訓飭於上行文書於下縱殫薄技難企清光而
官匪其人國家奚賴才不稱位有衆何觀祇竭忱誠仰
祈鴻造冀回渙渥改授英才俾仍舊班免貽非據之誚
其為榮幸殆與進擢均矣干冒宸宸臣無任

不允詔 趙彥中撰

勅某省所奏劄子辭免除知樞密院事恩命事具悉

朕惟以儒臣本兵權以毅將庀武守惟國家之長御
若臂指之相維卿學洞本原察含冰鑑躬公綽之不
欲邁壺遂之深衷清德藹聞遠猷彌劬擢繇政席晉
長機庭資沈心善照之謀濟厭難折衝之效是惟次
涉毋事冲辭所辭宜不允

辭免知樞密院事表

臣某言伏蒙聖慈以臣辭免新除知樞密院事恩命特
降詔書不允者左轄瘵官宜首加於幽點右樞分職敢
遽冒於顯除雖尺一之頒理不可違然再三之讀誠亦
難已臣某 中謝 臣竊以本兵地要率屬選高觀累朝之

求賢暨明王之籲俊或取其久更帥閭遂圖任而弗疑
 或為其嘗貳機庭越進遷而示寵故望以徊翔而加重
 智因練歷而愈明試可若斯僉諧必矣惟臣之慙無一
 而宜所窺者率皆古昔之陳篇所供者不過簿書之常
 守心豈識軍戎之要足未趨宥宥之嚴方二柄之臚分
 乃一朝而躡進聖神在上若為參前箸之籌哲又滿朝
 徒使愧後薪之積苟不力祈於避免殆將立抵於譴訶
 伏望皇帝陛下以稽古之聰明鑒用人之得失收還誤
 渥改授實能天祐高皇必有子房之決勝人歸宣右寧
 無吉甫之憲邦罔俾愚臣或妨賢路臣無任云云

奉御寶批

降批答不允仍斷來章

批答 熊克撰

省表具之朕獨總萬機分幹二柄冢司不兼武事有
 慶曆續定之規宥府不帶使名有元豐肇正之典參
 舉故事序升弼臣卿寬裕而有容開明而無滯道能
 方古在臯陶稷契之間文可作經出太史莊騷之上
 早編儀於華要久預贊於幾微晉典事樞蓋協時論
 何謙詞之確守乃需奏之尚陳其亟祇承毋庸抗避
 所辭宜不允仍斷來章

口宣

有勅卿父陪天緯進典神機顧渙號之已乎况師虞
之允穆並其祇命勿尚固辭今差某人賜卿不允仍斷
來章批答想宜知悉

謝表

臣某言伏奉告命授臣知樞密院事尋具辭免伏蒙聖
慈特降中使賜臣不允批答仍斷來章者獨化陶鈞之
上天啟聖謨折衝搏俎之間人需賢德孰云庸懦堪此
選除望帷幄以徬徨拜絲綸而懷慄臣某中謝臣聞兵
布於外是為爪牙權歸於中實寄心腹上下有相維之
勢古今存不易之規廟勝所闋才難為甚如臣者駕駘

步窘培塿形卑初非致遠之材敢起升高之念而遭逢
華旦忝竊殊知廿載神畿徧歷清華之地十年禁蒙遂
參輔拂之聯戴恩奚啻於丘山論報未施於涓滴所期
汰免何意褒遷越繇黃闈之嚴升踐紫樞之峻惟乃聖
乃神之真主方高出於百王豈不文不武之具臣可迭
居於二府懇辭弗獲祇受為慚茲蓋伏遇皇帝陛下政
急內修策先自治宅中圖大既隆道德之威詰禁軍
不廢甲兵之問姑緣人之猥用臣愚臣敢不激勵壯心
贊襄先務外攘夷狄願觀復古之勳載戢干戈尚觀垂
衣之化臣無任

謝太上皇帝表

臣某言伏奉告命授臣知樞密院事者東西置府對分軍國之權左右惟人協贊鈞樞之運猥容迭處良愧超遷臣某中謝竊惟宥密之司安危所寄議論近陪於帷幄機緘迎解於疆陲以克國之老臣尚艱踰度如魯人之肉食何有遠謀自非求儒術之真安得制廟謀之勝如臣者起家一第隨牒四方踈慵微稽古之勤昏鈍乏過人之略荷兩朝之見器偕多士以在廷金馬玉堂既久同於文翰鸞臺鳳閣遂參摻於政機豈才名烜赫之當然由歲月推移而至此曠職方期於簿責本兵更誤

於詔除借箸而籌何以仰符於上意假人以器居然恐累於宸恩俯倭拜嘉怛怩就列茲蓋伏遇光堯壽聖憲天體道性仁誠德經武緯文太上皇帝陛下冠冕百王而弗居其聖堪輿萬物而不有其功無疆惟休坐銷金鏑之氣必得其壽永享玉卮之歡謂時清非假如弼諧故質朽亦容於承攝臣敢不兢：夙夜勉：幾微遠至適安何取良平之策天長地久但祈堯舜之年臣無任

謝東宮牋

某言伏奉告命授某知樞密院事者三年豫政難逃指目之譏再命本兵益峻股肱之列已伏龍墀而叙感重

瞻鶴禁以知歸臣某中謝伏念臣才不逮人性尤忤物
適有天幸獨蒙上知靡更州縣簿書之勞即居臺省文
字之職昨仰親於三善嘗坐閱於六替始終獎予之殊
前後遷除之數華門圭竇方襍被以丐歸黃閣紫樞乃
牽絲而徧歷深惟負乘如履淵冰茲蓋伏遇皇太子殿
下天縱聰明日新德業取士斂才之切蓋根本於誠心
問安侍膳之餘每推揚於善類致茲新渥及乃舊人某
敢不思勵壯圖期酬夙眷信而好古雖莫陪東序之英
游從曰撫軍尚獲贊北征之盛舉謹奉牋稱謝以聞

謝明堂加恩表

臣某言伏奉告命以明堂大禮加臣食邑五百戶食實
封二百戶者宗祀告成一人能事湛恩敷錫四表懽心
曾是具臣亦叨徽數臣某中謝恭惟皇帝陛下事親以
孝撫民以仁無一念不存乎誠無一事不協於極宵衣
旰食允矣克勤公聽並觀濟之好問凡舜禹之德業固
皆優為如漢唐之規模殆不足進水旱既弭陰陽自調
躋民壽域之中偃革邊亭之外方且聖弗居聖新而又
新思歸功於兩儀用嚴配乎二后乃稽三歲之制乃盛
九筵之儀內殫一純外備庶物謁款道祖裸將太宮齋
明極其精專拜跪忘其勞勩庶事成備諸祥畢臻上焉

歸胙於庭幃下以均釐於普率善無小大賚予則同罪
無舊新滌除則徧可謂古今之壯觀聖哲之成能而臣
初之禮官司存之勞又匪方伯職來之助猥預右樞之
數僅參前導之聯而乃拜器幣於尚方耗金繒於外府
僥踰已甚愧汗靡任茲仍徹於多田益增光於在列曾
微千一之慮獨冒再三之榮歎太史之滯留彼奚不遇
錫康侯之蕃庶臣則何庸惟誓捐軀少圖報國臣無任
乞與王嘉賓換闕劄子

伏念臣妻之兄從政郎王嘉賓昨於淳熙五年內授封
椿庫監門待闕已及五年今夏當赴緣臣任參知政事

慮有妨嫌即曾奏知乞令回避伏蒙聖慈宣諭左丞相
准擇闕對換繼與一般軍器所監門保義郎李侯兩易
訖尋蒙恩備數西府其軍器所雖屬御前却是密院使
闕緣此本人奉親挈累徘徊累月以臣之故又復不敢
交割在臣合與陳述伏乞降付三省施行輕贖宸嚴臣
無任

歷官表奏卷第五 終

歷官表奏卷第六

周益文忠公集一百二十七

淳熙十年

同施樞密以旱灾乞罷黜劄子

七月

臣等仰惟陛下勵精庶政惠愛元、其於歲之豐歉無一日不軫宸慮此固中外所共聞臣等所親見也今者夏秋之際時雨偶愆聖躬焦勞天語惻怛修己之誠靡不盡恤下之政靡不舉祈禳之典靡不行宜格天休上副德意而膏屯未博衆情嗷、臣等並典樞機號為執政軍國庶務參裁其間既無以協贊修攘又不能交舉職業積此謬戾遂干至和雖欲逃刑何以文過願加顯

歷代通鑑輯覽卷之六
歷代通鑑輯覽卷之六
點不警曠瘼庶銷旱祥可必豐歲臣等謹已出郊待罪
伏乞睿斷即賜施行臣等無任慙懼俟命之至取進止
七月十三日奉御
寶批降詔不允

不允詔

勅周某等省所奏劄子為夏秋之際時雨偶愆乞加
顯點事具悉蓋聞天人惟精禋之交災異緣政教而
起朕德不類亢陽錯度省躬思咎 寐寤嘆卿等擁
樞贊微惟以共御厥罰消弭未形者宜雅知之方務
交修圖應天之實引愆避位豈朕所期祇竭大忠孚
臻休應所辭宜不允

同二府乞罷黜劄子

特進左丞相冀國公臣王淮宣奉大夫右丞相儀國公
臣梁克家通奉大夫知樞密院事兼權參知政事臣施師黜劄
朝請大夫簽書樞密院事兼權參知政事臣施師黜劄
子奏臣等茲以燮理無狀時雨不應上章自劾待命津
亭伏蒙聖恩各遣中使宣押歸第臣等迫於威命不敢
固違屏息家居恭俟嚴譴豈容偃然復入都堂治事欲
望睿慈速降處分大正典刑既協輿言必符天意臣等
無任

不允詔

勅王某等省所再上奏劄子以燮理無狀時雨不應
乞大正典刑事具悉昔成湯桑林之禱以六事而責
躬宣王雲漢之災矜百姓而修行蓋人君克己而上
注則天道悲怗而聽卑固難飾應變之文姑欲歸有
司之責卿等選於群獻式是百僚靡勤不宣何以致
常暘之咎繇朕不德無以厭上帝之心所以避正宁
而損 訪群言而緝政庶勵精而致改用因異而邁
休苟推過於弼臣是忘祗於天戒其思交儆贊翼
之機猷尚格至和達疊之歡樂勉圖嘉績宜弭來
封所請宜不允不得再有陳請

旱災乞黜表

臣某等言近以雨澤愆期兩具奏乞賜罷黜伏蒙聖恩
疊頒詔諭所請宜不允不得再有陳請者伏以亢陽為
沴上軫宸心豫政非才下喧物論既積難安之愧敢稽
自劾之章仰溫詔之曲留俯危衷而載惕臣某等

中謝

臣聞雲漢之歌宣后撥亂所以去灾春秋之紀衛侯興
師從而致雨足驗歲年之豐歉實關兵政之否臧今臣
等猥以斗筭參於帷幄圖事經遠有愧良平之腹心慙
威折衝未還文武之境土以此鬱中外之望宜其干陰
陽之和雲上於天至輟九重之宴樂月離於畢尚遲四

野之霽霓僉歸咎於具臣合自拘於司寇伏望皇帝陛下賞誅順帝視聽從民察樸櫟之亡堪本難近用念蘊隆之為虐當責逋僚或稍貸於斧斤姑斥還於田里雷霆之怒既震耀以不私霖雨其滋尚昭蘇之可必臣等無任

再乞黜劄子

臣等竊惟聖心閔雨甚至農夫望歲至切而常暘為沴天意未回臣等雖蒙聖恩少緩誅斥再勤勅使疊下詔函而震灼憂慙實難安職除已再上表陳乞外所有十六日以後立班奏事臣等不敢趨赴伏乞睿斷蚤賜罷

紕施行取進止

御劄不允

比以亢陽為沴時雨弗滋咎應之來其必有自乃敗食退次求言念愆思有以答天之戒所賴二府輔弼之良交倣不逮以導迎善氣而列章求去却而復上至於再三朕何望焉其安厥位益陳乃謀銷弭災變以副仰成之意故茲詔示想宜知悉

奏謝劄子

臣等伏為雨澤愆期再上表乞賜罷免特蒙聖恩寵錫宸翰粲然盈幅莫非禹湯罪己之言臣等相與誦歎震

懼無地昔漢世每有災異必切責丞相御史本朝故事亦以是降黜大臣今陛下則不然敗食退次詢求直言凡可責躬答天戒者無一不用其至獨於臣等則百方覆護屈撓常憲雖父母愛憐不肖之子亦恐未能寬恕如此臣等自當碎首捐軀圖報萬一惟是才術駑下謀謨淺拙終慮無所施設以少副陛下仰成之意尚容來日俯伏軒陛控叙危悰謹先具劄子奏謝伏乞睿照
預辭生日牲餼奏

臣伏見陛下以雨澤尚愆避殿減膳形於詔旨臣備位西府方自劾失職席藁俟命竊慮有司以臣生日在近例降中使匪頒牲餼臣實不敢祇受欲望聖慈預令寢免少安危懼取進止

御批

還政引灾已難狗請續齡錫慶何必預辭

生日詔

勅其任隆樞載望映時宗屬金德之乘秋儲菘靈而協吉特頒康錫庸示注懷今賜卿云：

謝表

臣某言伏奉詔書以臣生日特降中使賜臣羊酒米麪者門設之弧日切劬勞之念庭瞻爾特時豐燕飲之頒

歎親養之無從拜君恩而有覲臣某中謝伏念臣丁年孤露晚歲遭逢揆初度以興憐羨久生而奚益一自叨陪二府坐閱四期淺識寡聞詎堪於設醴素餐尸祿徒負於加籩矧當貶食之辰彌愧養賢之誼需章預控敬伸體國之誠宸翰隨放榮奉續齡之訓孰云異數猥及微臣茲蓋伏遇皇帝陛下盛德矜愚深仁厚下謂昔選掄之已誤豈今禮遇之或忘紫渙敷言異其嗟之路食黃封列岳灑可挹之天漿竊自省循若為報塞臣敢不仰銜鴻施俯厲孤衷愛之欲其生固難酬天地之造食烏急其事寧不畏鬼神之誅惟誓糜捐少逃訶譴臣無

任

為二兄乞再任宮祠劄子

臣輒有私誠上千宸聽臣有堂兄奉議即必端見係第
二任知縣資序昨授宮祠今年三月任滿欲赴部注擬
間偶值長兄朝請即必違事故孤幼無人照管緣此不
能前來坐食已八九月未免仰祿欲望聖慈特降睿旨
再差宮觀一任冒瀆天威臣無任戰汗之至取進止

東宮賀冬牋

子為天統占書先十二之辰日軌巽維化國測丈三之
景既兩宮之受祉宜二極之同休中賀恭惟皇太子殿

下仁孝中涵英明外著進德遠超於啟誦承顏並事於
勛華當令序之踐長知壽祺之增永某叨塵右府密企
東儲阻遙跡於賓階第竭誠於慶牘臣無任

太上皇后慶壽賀東宮劄子

某等仰惟主上恢崇聖治祇奉親懽昨以郊年嘗舉光
堯之慶禮今逢春日併陳文母之盛儀萬壽無疆四方
來賀殿下以天孫之愛儲極之賢適趨金殿之朝遂助
玉卮之奉邦家攸賴簡冊增光某等不獲躬詣宮庭謹
具劄子申賀伏乞令照

淳熙十一年

辭免樞密使劄子

六月

臣伏蒙聖慈除臣樞密使仍降中使宣押赴院治事者
恩渥殊常震惶失措臣竊觀本朝故事機庭置長或使
或知蓋因人才之優劣別資望之重輕元豐肇新官制
始刊使名雖有聖諭實惜之也自是四十餘年莫之或
改建炎紹興間二揆嘗司兵柄不過曰兼知院事而已
尋因舊相召還復令充使以示優禮其後或勲舊官至
公孤或忠賢名重帷幄間有除授而非積歲月之勞所
能至也如臣疲軟不任職庸瑣非遠器五年改路毫釐
無補見朝士則顏面外覲聽輿議則心神內悸豈獨臣

自知之固亦難逃衆目今乃以至劣之才而當至優之禮以至輕之望而尸至重之任此而弗懼可謂愚人伏惟皇帝陛下照臨有赫必能察臣之悃悞覆載無私不可假臣以名器姑仍舊次並格新綸天佑聖君自生豪傑隆名異數願少須之冒貢忱詞期於得請云々

不允詔

勅某云：具悉東西二府分掌政枋宥密之地體均輔廷朕儀圖真儒進筦丕務疇其美績俾正使名所以崇本兵隆國勢也卿以淵源宏奧之學濟魁壘光明之資折衝制勝謀於未形德威隱然允契群望朕嘉賴焉乃申明陟特峻事權惟幄之籌實用增重茲惟天下之公典朝廷所倚以尊安者卿烏得而辭乎往其欽承以若予采所辭宜不允

辭免樞密使表

臣伏蒙聖慈以臣辭免樞密使恩命特降詔書不允者掌武升華具言不稱摛文有爛申戎弗俞既分義之難安在黷煩而敢避臣某 中謝 臣竊以百僚序進俱俟有功四輔驟遷寧容無說雖位不可虛者尚當弄印則官不必備者烏用空餐矧今機宥之權自昔腹心之地陛下有武王之德而臣非閎散之才有高祖之明而臣乏

良平之畫不過疲精於簿書之內安能陳力於廊廟之中徒以久被厚恩未伸薄技身已病而不敢言去智已殫而靡容自休白首摧頽懷壯圖而惕若丹心激烈思來效以茫然幸顯黜之偶寬何明揚之輒冀倣聞殊渥良震危衷借欲冒居將如公議伏望皇帝陛下睿聰委鑒聖慮周思念其所居者何官而其所付者何事既已誤加於甄錄詎宜復假以使名收孚號於夫揚免煩言之嘖有為臣不易方當俯念於興邦惟帝其難毋或上虧於能哲臣無任

批答

省表具之五兵之運總於機庭七德之經本於儒術若時宥密之任實倚峻賢之圖卿名世瓌才經邦茂業踐修端直識詣高閎超自疑丞進司樞要夙宵匪懈中外以寧朕方攬髦傑以建治功勅時幾而集休命疇咨俊望顯有成勞爰陟使端之崇益觀廟算之勝所資翼亮懋建於殊勲奚務冲撓更伸於遜牘亟祇渙渥庸體眷懷所辭宜不允

辭免樞密第二表

臣伏蒙聖慈以臣再上表辭免新除樞密使恩命特降中使賜臣批答不允者囊封上達懇還右府之隆名綈

周益公集 歷官表卷之二
九
詔中頒飭遣左璫之信使耳方傾於報可心乃愧於往
諧敢躋厚以終辭期聽卑而遂允臣某 中謝竊以朝分
二柄任屬四隣雖文武並用常欲適平然軍國異容固
難代匱苟其人之未稱寧厥位之或虛如臣者資本腐
儒生逢昭代誤簡優隆之眷久叨清切之除以討論今
古為官常以綴緝詞章為事業自惟淺陋豈嘗軍旅之
聞何意選掄亦預甲兵之間一陪籌幄再易歲陰駕御
英雄仰淵謨之莫測經營宇宙知獨斷之有餘姑令省
閱於文書且俾奉行於詔旨叨踰已甚獎擢何居不量
才力之難堪直冒寵光而弗避是惟既患於得失豈復

能為於有無况今爵秩已崇事權已重若可致秋毫之
補自當殫辰告之猷奚以進遷速其顛沛伏望皇帝陛
下灼知情偽熟察智愚謂將：得於天資儲精既久念
賢：繫乎國體注意尤先勿使具臣更汙茂典令惟行
而弗反固干方命之誅民所欲而必從迄賴曲成之造
云：

批答

省表具之國家建右府以總戎昭命儒臣而崇使領
益自太平興國以來成憲具在迄於今茲必以宏才
碩學見聞殫洽者任之豈非兼文武之用明政事之

體乎卿博通古今德茂先覺發為謀謨足以斷國論
措諸事業足以恢政經夙被簡知延登樞近遠猶碩
畫宏益居多乃疇已試之庸申峻乂虛之號蓋將資
精神之運懋勲烈之隆使四夷咸賓萬邦底乂茲為
美報安事固辭其止謙勞亟從俞往所辭宜不允仍
斷來章

謝表

臣某言伏奉制命授臣樞密使加食邑一千戶食實封
四百戶累具辭免伏蒙聖慈特降中使賜臣批答不允
仍斷來章者職參兵柄乂愧罔功恩陟使權益慙非據

大矣雲天之施慄乎淵谷之臨臣某 中謝 臣審觀聖朝

之規模備知軍制之嚴密宿勁師於諸衛內有本疆之
威列戍卒於三垂外無尾大之患以致棊分州鎮星布
將兵衆寡得以相維邇遐期於克乂雖韜畧倚之虎士
而機權歸之柄臣故擇真才使當重任粵從南渡居念
北征扈行闕之衆不減於承平屯諸鎮之師又增於往
昔間有和戎之利實非偃伯之時費益加多用常不足
歲殆更於五紀人咸俟於中興然而宿將消磨每艱於
選授後生雜還罕歷於戰攻勤：旰之咨切：恢規
之志允資廟算協暢天聲臣於斯時猥備近列之尋常

之績效幸千一之遭逢以股肱而康未殫忠力用腹心
之傑敢冒寵榮當明制之誕頒疊遞函而丐免莫回成
渙祇奉鴻恩茲益伏遇皇帝陛下德紹祖宗量包夷夏
臣其莫及自廣運於聖神人不備求務兼容於巧拙遂
令孱瑣頻玷超除臣敢不勉勵哀殘少圖稱塞舜干來
遠素知文德之敷歸馬告功尚見武成之作云：

謝太上皇帝表

臣某言伏奉制命授臣樞密使加食邑一千戶食實封
四百戶者豫聞兵政無補萬分褒進使名有慙再命循
墻莫避履薄是虞臣某

中謝伏念臣起自諸生蚤蒙異

眷儒宮藏室許遙跡於英躔史觀霜臺浸問津於要路
恩施立山之重事功銖兩之輕荏苒華年侵尋皓首父
堯子舜幸逢千載之期左臯右夔馴點四隣之列屬在
戢戈之旦莫施借箸之謀碌：誇朝容：備位免大何
而已幸正近用以奚功非望所期茲崇寔懼此益伏遇
尊號太上皇帝陛下德隆上聖運啓中興凡今經武以
整軍皆昔定功而保大聰明不殺人懷有截之威安樂
延年天畀無疆之壽致令尸素不失高華臣敢不展四
體以勤勞報兩朝之恩遇日瞻太極豈容品物之謝生
身在康衢徒助歌謠而歸美臣無任感恩荷聖激切屏

營之至

生日詔

勅某卿材宏廟棟任重天樞啟素高既望之辰舉嘉
誕匪頌之式庸昭寵遇益俾壽域今賜卿云：

謝表

臣某言伏蒙聖慈以臣生日特降中使賜臣羊酒米麩
者祿養無從感蓬弧於私室恩頒有腴分牢醴於大官
藐是孤生愧茲異數臣某中謝伏念臣奮身寒苦息念
肥甘貧若顏回但慕簞瓢之樂道非伊尹敢思鼎俎之
干叨蒙神聖之知濫綴弼諧之列曾微一善可稱千鍾

逮逢初度之臨更冒多儀之錫詔音溫厚勅使光華嘗
羨悲遺母之言負米動為親之念隆私所被朽質奚堪
此益伏過皇帝陛下眷厚近司禮嚴故實饗殮而治慮
心力之俱勞宴樂于需推正中而及下是豐賚予丕勸
臣隣臣敢不祇拜君嘉勉圖忠報食天祿也富一醉而
則那由已饑之飽三軍而殆庶臣無任

賀東宮生辰劄子

某茲者恭遇皇太子殿下誕序甫臨萬有千歲中外同
祝而况兩宮勅使交馳慶禮邦家盛事今古所稀某夙
蒙恩遇密瞻鶴禁拘文獲與僚寮展拜庭下野芹寓誠

蓋循定例仰干威重罪何可逃伏乞令慈俯賜裁赦某
下情無任頌禱兢懼之至

東宮賀冬牋

統得於天實謂三正之首陽生於地俶觀一氣之升喜
溢宮庭歡均海縣中賀恭惟皇太子殿下溫文內蘊英
敏外彰日奉重親謹寢門之常度教行長子嚴却第之
新儀受福孔多與時偕永某密瞻玉彩阻奉瑤卮欣逢
有道之長倍切無疆之祝某無任激切頌詠之至

淳熙十二年

東宮賀年牋

天運無窮方衍萬年之曆聖圖有大載頌四海之春仰
淑問之歲、知休祥之簡、中賀恭惟皇太子殿下道
該周誦識邁漢莊贊育物之仁允資蒼震助麗天之照
丕赫少陽德已懋於日新福自臻於時萬某猥參丞弼
久荷恩私雖龍墀密望於儲暉而鶴禁阻修於慶禮瞻
依徒切頌詠奚殫

天申節滿散功德疏

奉萬歲之玉卮將修慶典獻千秋之金鑑適際誕期凡
在臣工敢稽美報假薰修於西竺致頌禱於南山尊號
太上皇帝彼被含生位尊太極夙享寅威之福今延安

樂之年矣運方興永對舒長之景薰風不斷常依長養之仁

乞令宰臣兼樞密使劉子

臣伏見仁宗皇帝慶曆二年秋晏殊為樞密使王貽永副之會西邊出師用諫官富弼之言詔宰相呂夷簡章得象並兼樞密使今北方情偽罔測正陛下經武整軍之時比之西邊事體尤重兼中興以後自有近例欲望聖明稽參故實命王淮梁克家兼總樞務既合公論亦協權宜臣累月來屢與施師點商量方敢奏稟如蒙許允臣自當悉心竭協贊萬一決不敢懷安避事仰辜任

使取進止

六月三十日批
出續聽處分

生日詔

勅某卿器資宏廓識慮淵通天生名世之英時賴保邦之策方協期於西顛適告望於素舒載臨嘉誕之辰宜舉匪頒之式今賜卿云：

謝表

臣某言伏蒙聖慈以臣生日特降中使賜臣羊酒米麩者蓼莪怙恃之勞俯臨載育伐木豆籩之踐深愧養賢拜賜周章捫心感嘆臣某中謝臣竊以初度者常情之共記惟親安足以為榮多儀者明主之異恩惟德稱乃

其無忝如臣孤露竊位高華旨甘不洎於平時尸素更
嗟於暮齒逮膺蕃錫彌震危衷蓬矢桑弧久負四方之
志羸肩卮酒曾何參乘之功茲蓋伏遇皇帝陛下恕以
取人惠於接物既爵祿不嫌於誤與在餽牽奚吝於匪
頒有來外帑之珍俾作私庭之寵罷朝為壽悵無張酺
之歡上馬被堅徒勉庶頗之飯捐軀以報永世為期臣
無任

問聖體劄子

臣等累阻侍清光不勝犬馬之情雖聞聖體安和但雨
後天氣驟涼莫可更展一二日然後視朝否臣等欲二

十四日午後略就內殿起居伏取進止

東宮賀冬牋

冬廩因陳雲告屢豐之兆歲祥習吉天臨大報之期已
鍾慶於嚴宸宜集禧於儲禁中賀恭惟皇太子殿下五
德備三善名彰奉亞獻於太宮聿嚴七粦登貳觴於
卯陛助格穹祇茂對一陽之來坐膺諸福之至其久陪
經席方侍籌帷雖莫預於進趨顧敢忘於祈向

郊祀禮成謝加食邑表

臣某言伏奉制命以郊祀大禮慶成加臣食邑一千戶
食實封四百戶者賚封於廟方予善人澤上於天亦揚

乎號顧何功於與祭乃冒寵於加田不敢獨辭惟慚虛
受臣某 中謝伏念臣積緣幸會屢侍親祠 黜崇班兩
陪於齋輅擢登樞筦再導於宸旒儒生之願已踰聖主
之恩曷報何期霈渥更忝徽章茲蓋伏遇皇帝陛下事
天寅恭待下仁恕嚴牲玉於大祀從周之文責酎金於
諸侯黜漢之陋故茲餽惠不必食功遂容尸素之臣例
被褒庸之典益之卹殿空慚書社之多歸我汶陽尚贊
版圖之復臣無任

謝太上皇帝表

臣某言云、拜况於郊甫畢祀天之禮施恩自迓亟叨

加地之榮承命以還省躬而懼臣某 中謝竊以宗祈盛
舉登配上儀本一人精享之誠來百執交修之助如臣
無狀竊位有年徒能陪羽衛以往回且復導冕旒而陟
降粗道不恭之謹初微可紀之勞何意宸綸益荒米邑
此蓋伏遇尊號太上皇帝陛下乾坤協德華夏歸仁勤
勞昔致於中興典則今貽於嗣聖上千萬歲之壽方歸
胙於慈庭同三千臣之心更均釐於黎獻致茲徽教畀
爾具臣曲逆更封愧及陳平之戶泰元增策願祈漢帝
之年云々

謝東宮牋

某言云：三歲習祥訖泰壇之大祀兆民賴慶均寰宇
之多歡曾何補於運籌乃猥叨於加地某中謝伏念某
夙蒙恩獎久預政機駿奔郊廟之間騎導車旗之內仰
睿主親祠之盡禮暨元良亞裸之竭誠知列聖之來歆
致三靈之錫羨已深榮遇更冒徽章茲蓋伏遇皇太子
殿下主冕凝猷重暉宣耀贊寬仁於君父厚體貌於臣
隣遂使空餐例增采邑漢儀既就初無待於最綿吳地
益封竊有慚於滌洗某無任

免赴正旦入賀劄子

十二月三十日

臣所患腰疾連日用數醫調理尚未痊安來日元正啟
祚且復慶壽大典誼當勉強入賀正慮失儀謹具控陳
欲望聖慈預賜矜恕其餘謹俟面奏伏乞睿照

歷官表奏卷第六 終

